

112
DISSERTATIO INAUGVRALIS MEDICA
SISTENS
DISQVISITIONEM
CAVSSARVM
STERILITATIS
HOMINVM VTRIVSQUE SEXVS,

QVAM
SVB AV^SPICIIS SVMMI NVMINIS
ET
CONSENSV GR^SATIOSAE FACVLTATIS MEDICAE
PRAESIDE
VIRO ILLVSTRI EXCELLENTISSIMO ET EXPERIENTISSIMO
DOMINO

D. ANDREA ELIA BVCHNERO

SACRI ROMANI IMPERII NOBILI,
POTENTISSIMO BORVSSIAE REGI A CONSILIIIS INTIMIS,
MEDICINAE ET PHILOSOPHIAE NATVRALIS PROFESS. PVBL. ORDINARIO,
IMPERIALIS ACADEM. NATVR. CVRIOSOR. PRAESIDE
ET COMITE PALAT. CAESAREO,
FACVLT. MED. H. T. DECANO SPECTATISSIMO,

PRO GRADV DOCTORIS
VMMISQUE IN MEDICINA HONORIBVS ET PRIVILEGIIS
DOCTORALIBVS LEGITIME IMPETRANDIS

AD D. V. IVLII A. S. R. MDCCXLVII.

PVBlice DEFENDET

AVCTOR

ADAMVS MOLNÁR,

NOBIL. HVNGARVS.

HALAE MAGDEBVRGICAE,
TYPIS IO. CHRISTIANI HENDELII, ACAD. TYPOGR.

58700(17)



V I R O
ILLVSTRI, EXCELLENTISSIMO
ATQVE EXPERIENTISSIMO,
D O M I N O
D. ANDREAE ELIAE
BÜCHNERO,

S. R. I. NOBILI,
SERENISSIMO AC POTENTISSIMO PRVSSIAE REGI
A CONSILIIS SANCTIORIBVS,
IN ACADEMIA REGIA FRIDERICIANA MEDICINAE ET
PHYSICES PROFESSORI PVBLICO ORDINARIO,
ACADEMIAE IMPERIALIS NATVRAE CVRIOSORVM
PRAESIDI DIGNISSIMO, ET COMITI PALAT. CAESAREO,
FACVLTATIS MEDICAE H. T. DECANO SPECTATISSIMO,

DOMINO PATRONO ET PROMOTORI
INPRIMIS COLENDO,

IN GRATI ANIMI TESSERAM

DEBITAEQVE REVERENTIAE MONVMENTVM

DISSERTATIONEM HANC INAVGVRALEM

CVM VOTO PERPETVAE PROSPERITATIS

D. D. D.

A V C T O R.



§. I.



Omnibus, quae mortali conditione generata sunt, a natura tributum est, ut quodammodo sempiterna sint, non quidem numero & substantia, verum specie, dum immutabili aeternitate viventium ortus & procreationes continuantur. Aduertimus enim, quodlibet indiuiduum, cum mortale & dissolubile se sentiat, aliud sibi simile optare in suum locum reponere, in quod & languidam, & inclinantem suam vitam quodammodo conferat, & cuius procreatione quasi repuerascens & renouatum, quodammodo perpetuum fiat & aeternum. Hanc ob rem Creator sapientissimus duplicem sexum, maris & feminae, condidit, utrique tum facultatem, tum organa ad procreationem sui similis necessaria tribuens, quae in complexu inter se miscendo semet, tertium progignunt, ut sic species in perpetuum salua

conseruaretur. Interim quamuis haec generandi libido cunctis viuentibus aequaliter indita sit, videmus tamen alia alijs esse foecundiora, & ad speciei suae multiplicationem ac propagationem aptiora alacrioraque; immo experimur nonnulla officii sui penitus quasi oblita atque sterilia. Quodsi enim contemplamur nobilissimum illud animale naturae regnum, obseruabimus profecto innumera hominum aequae ac brutorum animalium infoecundorum & steriliū exempla, audiemusque plurimos mortaliū vtriusque sexus de ἀτεκνία, siue, vt cum HIPPOCRATE loquar, de ἀφρογία & ἀγεννησία conquerentes, de quibus eleganter Celeberrimus D. D. HEBENSTREIT, in *Patholog. metr.* §. 4. v. 138.

Deus irrita vota

*Pluribus esse sinit, videns genitalibus aruis
Tunc nullas nasci segetes*

& v. 73.

*Et sua fata maritus habet: mox irrita vota
Consecrat, & vacuas celebrat cum coniuge noctes.*

§. II.

Communis quidem est haec fors cuius mortaliū ordini, at cum tenuioris fortunae homines plerumque ex maturiori coniugio parentibusque firmis ac vegetis nascuntur, simplicius educantur, & moderato victui laboriosaeque vitae a teneris adsueti, corpora in ineunte aetate neque otio torpida, neque vino Venereque debilitata ac eneruata reddunt, sed integras vires plenasque pharetras ad thorum coniu-

coniugalem adferunt, fit, ut in his rarius sterilitatis vitium obseruetur. Contra lautioris fortunae mortales, quae & natalium splendore, & opum adfluentia fulgent, persaepe vel ex immatura debiliue Venere procreantur, vel parentibus valetudinariis nascuntur, vel nati delicatule fouentur & educantur, vel denique, ubi vix ex ephebis excesserunt, vita inordinata Cerereque & Baccho corpora sua debilitant, destruunt, seseque, priusquam viri sint, euirant. Hinc non mirum, eos plerumque, qui omnibus fortunae bonis adfluunt, quae in summo felicitatis huius vitae fastigio constituti sunt, natorum ex se heredum solatio destitui, & experiri, quod nihil sit ab omni parte beatum. Vnde fit, ut plurimis horum & vita sit minus iucunda, & mors acerba, praevidentibus quippe, post fata hereditates suas & bona anxie conquisita ac conseruata in alienas manus peruentura; ut taceam immensam rixarum segetem, & saepe reipublicae noxias discordias, fata eorum nonnunquam comitantes.

§. III.

Haec rerum humanarum vicissitudo, huiusque curatio pensitatio ansam nobis praebuit, ut, dum quaecunque specimen inaugurale medicum, profectuum in castris Apollinis factorum, dare vellemus, in causas sterilitatis hominum utriusque sexus inquire constitueremus, & quidem eo ordine, ut determinata sterilitatis notione, primum in genere causas eius in utroque sexu disquiramus, dein vero figillatim primum in maribus, tum in feminis easdem pro virium

virium modulo excutiamus. Faxit vero propitium Numen, ut tenue hocce nostrum conamen in sui nominis gloriam, & proximi cedat emolumentum.

§. IV.

Dicturis de *Sterilitate*, non est nobis animus in campos Philologorum excurrere, vocisque huius homonymias & synonyma anxie conquirere, item an ea a graeco *σῆγος*, haecque a *σῆγω*, *primo*, originem ducat? quaeritur potius hic, an praedicatum sterilitatis in utrumque sexum quadret, an vero sequiori tantum conueniat? Minime quidem nos latet vulgo nota illa distinctio, qua infoecundam feminam *sterilem*, marem vero, qui se virum praestare in Veneris sacris nequit, *impotentem* adpellant, quam & nos in suo valore relinquimus: at non facile quisquam illum decalogi Hippocratici reum arguet, qui & in maribus sterilitatis causas quaerit, cum in scriptis Medicorum haud infimi subsellii haec promiscue sumpta & usurpata aduertamus integraque capita in practicis, aut integros tractatus, de sterilitate utriusque sexus inscriptos, videamus.

§. V.

Immo nisi nouationis suspectas redderemus hasce pagellas, statueremus & sterilitatem, & impotentiam certo respectu in utroque sexu: cum *impotentia* vi nominis dici posset ille status, ubi vel in femina vitium conformationis externum, vel etiam quocunque casu acquisitum, in partibus genitalibus impedimento est, quo minus congressus coniugalis locum debite inueniat, vel viri membrum siue ob defe-

defectum erectionis, siue ob aliud quodcunque vitium, ineptum est ad praestanda mariti officia. *Sterilitatem* autem eum diceremus statum, in quo, externis organis utriusque recte se habentibus, coitus quidem celebratur, semen emittitur & recipitur, sed impraegnatio non sequitur, causa vel in semine virili, vel in aruo muliebri latente. Interim hanc opinionem nemini obtrudentes, praemonendum duximus L. B. nos hic termino *sterilitatis* de utroque sexu uti, non quidem animo contradicendi distinctioni §. IV. adductae, sed ne id, quod de sterilitate valet, respectu impotentiae repetere, sicque cramben bis coctam apponere debeamus.

§. VI.

Pro impedimentorum generationis varietate, varias etiam sterilitas admittit *diuisiones*; sic respectu aetatis & vitii organorum, diuiditur ea in *naturalem*, seu *congruam*, & *praeternaturalem*, seu *non congruam*. *Naturalis sterilitas*, improprie ita vocata, est illa conditio partium genitalium, ubi hae per aetatem ad generationem ineptae sunt. Atque huc refertur aetas impuberum, quibus partes generationi dicatae nondum ita euolutae sunt, ut ex coniunctione sexus tertium produci possit. Ceterum diuersis haec aetas, pro gentis, hanc vel illam regionem incolentis, item pro climatis, temperamenti ac nutrimenti, hinc sequentis incrementi & roboris, sexusque diuersitate, circumscribitur limitibus, ut taceam educationem & conuersationem, quae haud parum impuberum maturescentiam accelerat, vel retardat.

Hinc adparet, in quantum Legislatores Romani rem acu tetigerint, plenam pubertatem utriusque sexus lege constituentes ac determinantes. Vix enim natura in his leges sibi praescribi patitur, quippe quae, ut supra laudatus D. D. HEBENSTREIT, *l. cit. p. 21.* scribit:

*Plus virtutis habens, quam quae pro corpore solo
Sufficit augendo, vacuos nunc semine testes
Prolifico natura ferax complere laborat.*

Dein ad hanc classẽ sterilitatis refertur & illa aetas effoeta ac senilis, in qua fontes exhausti & exarescentes, fractaque & hebefacta arma, in castris Veneris adhiberi solita, utrumque sexum receptui canere iubent. Ceterum nec senilis haec sterilitas eodem apud omnes clauditur termino: videmus enim feminas citius, mares tardius, immo & illas, & hos inter se maturius, vel serius deflorescere, effoetosque fieri.

§. VII.

Praeternaturalis porro, seu non congrua sterilitas, est ille status hominum utriusque sexus, ubi vel ex vitio organorum generationi inseruientium, interno vel externo, vel in partibus corporis solidis aut fluidis latente, congressus coniugalis vel celebrari nequit, vel sine subsequa conceptione celebratur, congrua ceterum aetate & modo. Atque in huius causis indagandis nos inprimis in sequentibus sollicitos esse oportet. Sunt etiam, qui existimant, vi quaedam occulta & artibus diabolicis induci posse mortali-

talibus sterilitatem, quam *supranaturalem* vocant; hanc vero hic tantum nominasse sufficiat. Maioris momenti est illa *artificialis*, quam turpis lucri spe inducti, potissimum Itali, puerulis testiculos exsecando, & Turcae aliaeque gentes Orientales, zelotypia motae, omnia penitus virilitatis testimonia delendo, in suis perpetrant. Immo nec desunt exempla castrationis in puellis, exsectis ouariis peractae, qualem observationem habet *Regn. de GRAAF*, de rustico quodam Germano, salacem suam filiam castrante.

§. VIII.

Deinde respectu personarum, cum hoc vel illo individuo in matrimonio sterili viuentium, diuiditur sterilitas in *relatiuam*, & *absolutam*. *Relatiue sterilis* dici potest illa persona, quae ex connubio huius individui quidem spe sua matrimoniali excidit; quamprimum vero aliud subiectum sibi adiungit, omnia ei ex voto fluunt. Contingit hoc frequentius, vel ob latentes quasdam in alterutro coniugum causas, vel ob nimiam aetatis, virium & constitutionis corporis disparitatem, vt *LANGIVS in Diss. de Sterilitate, §. XXVII.* docte obseruauit. Vbi enim mas ad conflictum venereum alacris fuerit, femina autem non tam facile in oestrum rapiatur, vel vice versa, sterilis ut plurimum redditur concubitus. Prostant plurima talis matrimonii, in historiis & observationibus medicis, exempla. Sic *Liua* ex *Tiberio Nerone* liberos suscepit, *Tiberium* & *Drusum*; *Caesari* vero *Augusto*, etsi maxime ab eo adamaretur,

tur, nullam edidit sobolem, teste TACITO *Lib. V. Annal. cap. I.* Huc facit quoque notabilis casus, ab immortalis memoriae BOERHAAVIO, in *Praelect. ad Inst. rei med. ad §. 694.* de principe Galliae adnotatus, qui diu cum optima vxore in sterili coniugio vixerat; vltimo ex iudicio supremæ Curiae coniugium solutum est, sed mox maritus in viduum thorum aliam vxorem duxit, & vidua alteri nupsit, atque ille filios, hæc pariter prolem ex secundo coniugio tulit. Cui exemplo Vir ille illustris hanc subiungit epicrisin: *Adparet, foecunditatem etiam a mutua quadam relatione pendere posse, absque vlllo absoluto vitio aut viri, aut feminae. Absoluta vero sterilitas, de qua iam HIPPOCRATES Lib. de Nat. mulier. & de Sterilit. mentionem fecit, illa dicenda erit, vbi omni tempore, omni loco & omni modo Venus languet, vel sine successu celebratur.*

§. IX.

Porro impedimenta generationis haerent vel in ipsis membris propagationi generis humani dictis, vel in alio corporis externo vel interno vitio; vtrumque vel a parentibus habemus, vel quomodo-cunque nobis adtraximus. Atque hinc emergit sterilitatis diuisio in *connatam*, & *adquisitam*. *Hereditariam* fingere absolum duco, cum nemo facile patrem matremue suam & maiores suos sterilitatis arguet; nisi per hanc *connatam* intelligere velis, vbi quis vel quæ vitium aliquod organicum ex vtero materno secum adfert, vel singularem quandam totius corporis debilitatem, huc vsque se extendentem,

tem, a parentibus quasi transplantatam, nanciscitur, id quod inprimis illis euenit, qui vel ex praematuris, siue serotino nimis thoro, vel parentibus morbis chronicis, arthriticis, scorbuticis, aut nephriticis affectis ac debilitatis, nati sunt. Certum enim est, fortes creari fortibus, debiles debilibus, valetudinarios valetudinariis. Tale exemplum coniugii sterilis coniugum ex debilibus parentibus ortorum, habet Illustr. Frid. HOFFMANNVS, *Med. rat. system. Tom. IV. itemque Consult. & Resp. Med. Cent. II. & III. Sect. IV. Cas. CXX.*

§. X.

Tandem respectu durationis & euentus aliam *constantem ac perpetuam*, aliam *temporariam* posses dicere sterilitatem, vti multa sunt exempla coniugum, plurimos annos infecundorum, donec tandem nodus Gordius soluitur, & aloë flores fructusque fert, vbi alii ad tumbam vsque oleum & operam perdunt, vitio vel in alterutro coniugum latente, vel & terra sterili, & femine fatuo, existentibus. Contingit etiam, vt viro vel alteruter testiculus, vel vterque, vt & feminae ovarium ablatum, vel vitiatum sit, quo respectu nonnulli diuidunt sterilitatem in *unilateralem*, & *bilateralem*. Sed hoc vitium raro generationi officit, & habemus exempla monorchidum, aequae ac vno ovario praeditarum, quae filios & filias procrearunt. Vbi vero vtraque haec vasa defunt, vel vitio laborant, ibi plenariam sterilitatem adesse extra dubium est. Praeterimus reliquas sterilitatis diuisiones, in *epidemicam*, cuius non

facile habentur exempla, & *endemiā*, quae non tam toti regioni vel vrbi, quam familiae cuidam interitum minari potest, vbi plures fratres & sorores sine prole decedunt. Vnica adhuc tamquam prognostica adiaci posset, nempe sterilitatem esse vel *curabilem*, vel *incurabilem*, quae vero in superioribus fundata est distinctionibus. Atque haec de definitione & diuisione sterilitatis praemittenda duximus: transibimus iam ad ipsam causarum eius disquisitionem.

§. XI.

Vnius rei plures esse posse causas, & ratio & experientia docet; hinc praeuideo insignem difficultatem, omnes sterilitatis causas accurate inuestigandi & detegendi, cum tot tantaeque obscuritates occurrant ratione diuersorum subiectorum, vt vix, ac ne vix quidem semper diuinare liceat, quatenam in hoc vel illo indiuiduo causae lateant. Accedunt diuersae & saepe ineptae sententiae Veterum ac recentiorum, qui modo hoc, modo illud fermentum vterinum, aut suum archaeum laesum, aut dormientem, languidum, & quae sunt reliqua, accusant, in quos non immerito doctissimus SYDENHAM, in Praefatione Operibus suis praefixa, censorium calamus strinxit, dum, *nemo, inquit, autem est, qui non videat curiosos istos speculatores in causis primo primis fere ac remotissimis indagandis, ac in lucem, (vt vt inuita Minerva ac reclamante naturae sensu) protrahendis operam perdere; immediatas vero & coniunctas, seu ante pedes iacentes, contemnere, quae tamen*

tamen necessario debent cognosci, & possunt etiam, si-
ne ficulneis huiusmodi adminiculis, cum intellectui
se aperte sistant, vel proprii sensus testimonio, vel ana-
tomicis observationibus ab aliis iam pridem factis, re-
tectae. Atque ut impossibile est, ut Medicus eas mor-
bi causas ediscat, quae nullum prorsus cum sensibus
habent commercium, ita neque est necesse; abunde
enim sufficit ut sciat, unde immediate oritur malum,
talesque eius effectus atque symptomata, ut inter
hunc aliumque morbum, huius non dissimilem valeat
accurate distinguere. Nobis igitur, missis de fer-
mentis & archaeco somniis, animus est insistere inue-
stigationi causarum, quae intellectui sese aperte si-
stunt, vel proprii sensus testimonio, vel anatomicis
observationibus ab aliis detectae sunt.

§. XII.

Causarum, quae in utroque sexu ad sterilita-
tem suum symbolum conferre possunt, multae ita
sunt comparatae, ut, licet non per se sterilitatem in-
ferant, tamen pro diuersitate subiectorum, aetatis
& circumstantiarum concurrentium, eandem pro-
ducant. Non opus est hic respectu aetatis multa di-
cere, de qua §. VI. necessaria iam monita sunt.
Cedit quippe vitium sterilitatis in eam praecipue
aetatem, quae liberis progignendis matura, apta
habilisque censetur, quaeabilitas ordinarie adesse
indicatur, ubi in maribus feminis secretio, oris ac
partium genitalium pubescencia se prodat, in femi-
nis vero menstrui fluxus molimina & primitiae ad-
parent

parent a); cessante vero in his plethora, mensibusque evanescentibus, & in illis secretionem boni sanguinis, ac excretionibus parcius succedentibus, fibris & musculis debilitatis, fecunditatem quoque cessare, si non certum, tamen admodum probabile est.

§. XIII.

Sed priusquam pedem ulterius proferamus, quaeritur hic: An sexus alter prae altero aliquam praerogativam in negotio generationis habeat, numque plures viros, an feminas steriles orbis alat? id quod quidem observationibus illustrare non possumus, nulli vero dubitamus posterius adfirmare, credentes cum MANNINGHAMO b), & Auctore Traët. de l'Impuissance, Paris. 1611. sterilitatem coniugum plerumque esse a feminarum vicio, quippe quae, teste Illustr. Frid. HOFFMANNO, Med. rat. system. Tom. II. P. III. Cap. I. §. 30. prae viris, morbis plus sunt expositae, adeo ut duplo maiores illae patian-

a) Eleganter sane *Diotima*, mulier fatidica, SOCRATI in Symposio: *Omnium*, inquit, o *Socrates*! *hominum praegnans & grauidum est corpus, praegnans & anima. Et cum primum ad certam aetatem peruenimus, parere nostra natura cupit.* vid. FERNELIUS Lib. I. Cap. VII. de abditis rerum caussis.

b) In artis obstetr. Compend. Sect. de Conceptione: *Oritur*, inquit, *sterilitas plerumque feminarum vicio, triginta enim mulieres steriles in singulos viros impotentes, si diuisio fieret, inueniri possunt.*

patiantur, hocque inprimis respectu vteri, qui iam ab HIPPOCRATE, *de morb. mulier. II.* omnium morborum caussa habitus est, quem & WEDELIVS *in Exercit. med. philol. Cent. I. Dec. I. Exerc. VIII.* auctorem & centrum quoddam affectuum muliebrium dicit, ex quo omnes quasi lineae ducuntur, omnesque illuc ex toto corpore confluunt. Immo si vel vnicum menstrui fluxus negotium consideramus, quot quantisque iniuriis expositum sit, & quam exacte fertilitas huius soli ab eo dependeat, facile L. B. nobis consentientem habebimus, qui immunitatem masculorum ab his incommodis perpendit, vtut & hi suos saepe patiantur manes.

§. XIV.

Sed accedamus propius ad praefixum scopum, inuestigaturi causas sterilitatis primum in *temperamento habituque corporis* sexus utriusque. Exstare in sanguine nostro, qualis per vasa corporis humani fluit, haec quatuor principia, aquam, terram, sallem & oleum, chemica experimenta docent. Et quidem aquae in corpore humano tanta copia reperitur, vt merito praecipuum corporis nostri elementum habeatur, adeo, vt & ipsas partes eius solidas plus aquosarum, quam terrearum particularum continere, Chemia ostendat; de oleo vero nostro animali ipsa pinguedo, prout de salibus saponaceis bilis & saliua abunde testantur. His corporis elementis ea proportionem inter se mixtis, qualis ad perfectam requiritur sanitatem, nascitur corporis temperies; vbi vero aliquod horum praedominium prae reliquis

C

tenet,

tenet, fit illud, quod Veteres *temperamentum* vocarunt, huiusque, pro numero elementorum corporis, quatuor species, *sanguineum, cholericum, melancholicum & phlegmaticum*, constituerunt. Frequenter contingit etiam, ut vnum ex his elementis nimia proportionie reliqua excedat, inde *intemperies* totius corporis, *frigida vel calida, humida vel sicca*, foecundissima morborum genitrix, nascitur. Nam ubi aqua in corpore abundat, tota eius substantia est laxa, frigida, tumida, pallida, & prae debilitate languens, hydropica: unde in talibus corporibus ventriculus & omnia viscera, concoctioni secretioni & excretioni inseruiencia, atonia laborant, consequenter nec chylus bonus, nec sanguis probus & prolificus generari, nec denique liquor genitalis viuus fecerni, praeparari ac perfici potest, adeoque nec felix sui generis propagatio ab his mortalibus expectari.

§. XV.

Pari modo principiorum salino-saponaceorum excessus, dum acrimonia sua volatili omnes succos & humores corporis inficit, morbos arthriticos scorbuticosque generando, viscera & vasa destruendo, totamque sanguinis massam putredine defoedando, utrique sexui sterilitatem infert. Immo nec ex iis facile liberi sperari possunt, in quorum corporibus siccum illud terreum elementum nimia sua copia praedominium tenet; prout enim ex fonte, cuius ductus & scaturigines exaruerunt, limpidam aquam non hauries, & ex trunco arido germen raro vide-

videbis, ita ex macilento tristi & tabido corpore praeditis frustra sobolem expectabis. Nec minorem sterilitatis metum nimia oleosarum particularum in corpore abundantia incutere potest. Obesa enim corpora laborant summa inertia, liquidorum immeabilitate, ob vasorum pinguedine sepulorum teneritatem ac debilitatem, totius denique substantiae frigidity & insensibilitate, ut taceam coitus & conceptus impedimenta, infra ex HIPPOCRATE adducenda, qui etiam, adductas sterilitatis ex intemperie ortae causas Sect. V. Aphor. 62. & 63. omnes complectens, primum de mulieribus: *Quaecunque, inquit, frigidos ac densos uteros habent, non concipiunt*; ratio est, quia tales uteri & venas & vasa habent angusta, sanguinisque menstrui inopia & frigidity laborant. Pergit porro laudatus Senex: *Quaecunque humidos habent uteros, non concipiunt, extinguatur enim in ipsis genitura*; & *quaecunque siccos magis & adustos habent uteros*; prae inopia enim alimenti corrumpitur semen. Haec de feminis; de viris autem Aphor. 63. dicit: *Similiter autem in masculis: aut enim propter corporis raritatem spiritus extra fertur, ut semen non deducat: aut propter densitatem humor non procedit foras: aut propter frigidity non concalescit, ut ad hunc locum congregetur, aut propter caliditatem hoc idem contingit.*

§. XVI.

Hanc corporis temperaturam plerumque &

animi mores sequuntur c). Quaecumque enim etiam sit entis cogitantis cum machina corporis nostri quam maxime composita commercium, hoc longe certissimum est, aliquod esse, id quod animi affectus clare, uti puto, loqui videntur, quorum efficaciam & in negotio generationis animadvertere licet. In-
uiti

c) Quantopere animi pathemata, & negotiosae mentis actiones corpora mortalium eneruent, ostendit Illustr. PLATNERVS, in doctissima Dissert. *de negotiosa actione propter valetudinem circumcidenda*, ubi §. VI. *Animi vero affectus, veluti iram terroremque, saepe graues ancipitesque morbos facere, quotidianum est. Nec multo minorem efficacitatem habent aliae affectiones, quae lentius & quasi cunctanter procedunt. Nam & hae animo insidentes corpus ita laedunt, ut illud longinquis morbis contabescat &c.* Et §. XIX. *Exhauriuntur intenta cogitatione illi tenerrimi succi, a quibus in corpore omnis sensus, omnis vitalis, naturalis, animalis, immo & humana actio dependet. Hinc §. XXVI. acrem attentamque cogitationem, mentemque inquietam vitandam iis suadet, qui liberis operam daturi, venereis voluptatibus utuntur, subiciens rationem, venereas res, & insidentes animo ex acri contentione cogitationes, vires minuere & frangere, hocque facto hominem ad propagationem ineptum reddi, unde tandem sub fin. §i concludit: Omnem negotiosam actionem, quae rationem, mentem, consilium, cogitationem requirit, a rebus venereis esse alienam.*

uiti enim amores ut plurimum steriles, desiderati contra foecundi esse solent. Mens itaque a Venere penitus auersa, teste *Laz. RIVERO, Prax. med. Lib. IX. Cap. XV.* itemque odium, moestitia, similesque vehementiores inter coniuges vigentes affectus, haud raro steriles reddunt thoros, cui suffragatur & *III. HALLER, in notis ad Praelectiones Boerhaavianas §. 694. not. n.* dum causam sterilis coniugii plerumque defectum veri inter coniuges amoris esse statuit. Non ausim quidem cum *MERCVRIALI Lib. II. de morb. mul. cap. 2.* pro apodictica veritate venditare, feminam foecundam, tempore cohabitationis cum viro plorantem, prolis non reddi participem, cum plurima prostent exempla puellarum violenter defloratarum, feminarumque violenter compressarum, quae tamen & conceperunt inuitae, & pepererunt feliciter. De sic dictis mysogamis, & quae ad horum naturam accedunt, viraginibus, Veneris usum non solum non appetentibus, sed plane reformidantibus, eleganter *PROPERTIUS Lib. I. Eleg. XIV.* canit:

*Parcior est illi Veneris vel nulla cupido,
Membra sopita iacent, nihil hic iuueniliter vrit
Castus amor, viridisque senex florentibus annis
Deficit ante diem, seseque ignauior ipso est.*

§. XVII.

In his vero explicandis an ad solum corpus respiciendum, & ab eius insipidis vndis talis in Venere torpor deducendus, an ad idiosyncrasiam confugiendum

dum sit, dubius fane haereo. Solum corpus eiusque humores accusare nollem; hoc vero persuasus credo, pro diuersa crasi fluidorum & structura tensioneque solidorum corporis humani, diuersam quoque esse animae oeconomiam; at, haec iterum quatenus per se ista fugiat, illa ambiat, ad haec obeunda prompta, ad illa deses sit, haud facile determinari poterit, cum & ipsae impressae ideae gratae, vel ingratae Psychologorum, haec non omnino satis exhauriant. Nollem vero cum Astronomis hanc ob causam astra adire, & inquirere, an tempore partus huius vel illius indiuidui, Venus a Saturno laesa sit, vel etiam sterile illud subiectum in Saturni vel gemellorum signo natum sit, quemadmodum ALBERTI M. libellus *de secretis mulierum*, aliorumque similis farinae Auctorum scripta, talibus naeniis referta sunt. Videntur enim hi astrales Auctores deos e coelo vocare, vt soluant nodum fabulae, vt WEPFERVS *de Cicut. aquat. cap. XV.* loquitur. Dices, ergo idiosyncrasia quaedam accusanda erit, vel cum HIPPOCRATE ad τὸ θεῶν prouocandum, & sincere fatendum, esse aliquid, quod nec dici, nec describi potest; sed & hi termini hodie atro lapillo notantur, & *asyla ignorantiae* vocantur. Si vero dicendum quod res est, vbi nec acie mentis, nec oculorum quidquam detegere licet, ibi doctam ignorantiam nonnunquam profiteri praestat, quam incerta, ludicra & fabulosa fingere, idque saltem ne nihil dixisse videamur.

§. XVIII.

Sed lustremus porro res extra nos fitas, quae influxum quendam in corpora mortalium, & quidem pro diuersa eorum receptiuitate diuersum, habere obseruamus, latentes in his sterilitatis causas indagantes. Huc referimus cum HIPPOCRATE, *Lib. de aëribus, aquis & locis*, regionis situm & clima, aëris mutationes, anni tempus, rerumque non-naturalium vsum & abusum, reliquasque earundem circumstantias. Ita laudatus Senex *l. c. §. III.* notat, incolas ciuitatum in plaga meridionali, locisque palustribus & lacustribus sitarum, ventisque & Soli non bene patentium, pro tempestatis variatione, variis morbis obnoxios esse, humida ac pituitosa capita habere, ventres ipsorum frequenter exturbari, formas debiliores esse. Hinc morbos iis vernaculos recensens, mulieres multas steriles esse ex morbo, non a natura, & frequenter abortire, scribit. Vterus enim nimis fluxionibus obnoxius conceptionem non admittit, vel semen inspersum nimia humiditate sua extinguit, quod demum cum sanguine menstruo copiose adfluente elabitur. Non secus viros frequentibus dysenteriis & ventris fluxibus, febribus longis, aliisque longo numero ibidem recensitis morbis adfectos & eneruatos, steriles euadere obseruat.

§. XIX.

Dein & *temporum anni* variae mutationes, ventorumque austrinorum & aquilonarium praedominium, prout plurimorum morborum, ita & abortus ac sterilitatis, tam in hominibus, quam brutis, saepe

saepe causae esse solent, ut hoc, praeter alios observatores, Illustr. Frid. HOFFMANNVS, in *Observationibus barometr. meteorol. cap. VI. & VII.* & in *Tr. de temporibus anni insalubribus, Tom. V. Operum*, adnotavit d). Sed frequentiora adhuc rerum non-naturalium abusus generationi ponit impedimenta. HIPPOCRATES *l. cit. §. 5. & 6.* recensitis morbis, qui ex aquarum frigidarum durarumque usu oriuntur, §o sequenti: *Ex mulieribus vero, inquit, primum quidem multae steriles fiunt, propter aquas, quae durae sunt ac crudeae & frigidae: purgationes enim mensium non contingunt commodae, sed paucae ac pravae; idque, ut Ludou. SEPTALIVS in Comment. ad hunc locum dicit, ideo, quia ob aquarum duriem, crassitiem, frigiditatem, sanguis quoque crudior, crassior, frigidiorque redditus, expurgari, obstructis meatibus, non potest, quo facto vasa sanguine turgentia genituram non admittunt, immo etsi admittant, nutriri eam prohibent. Quae vero aquas palustres potant, his, inquit diuus Senex, oedemata oboriuntur, & pituita alba, & in ventre non concipiunt.*

§. XX.

Prout vero defectus cibi & potus, (iuxta illud:
Sine

- d) Frigus intensius seminis generationem impedire, docet Mich. ETTMÜLLER, *Opp. Theor. pract. P. II. Cap. XIV.* & SALMVTHVS *Cent. III. obs. 91.* refert, milites per aquam transuadantes, cum testes refrixissent, etiam animositatem amisisse, sterilesque factos esse.

Sine Cerere & Baccho friget Venus,) immo & parcus nimis ac pravi nutrimenti victus steriles reddit mortales: ita & excessus multum generationi officere potest. Voraces enim & ebriosi dum ventriculum nimia ciborum & potuum copia onerant, huic atoniam inducunt; hinc deprauata concoctio, visceris huius debilitas, flatulentia, cruditas chyli, reliquorum viscerum atonia, deprauata sanguinis mixtio, obstructions, sexcentaque huius generis mala, in tota corporis machina oboriuntur *e*). Hoc autem facto, impedita probi sanguinis secretionem, sobolis quoque, corpore in hoc statu permanente, frustra speratur procreatio. Neque enim ea, quibus ventriculus infarcitur, nutriunt, sed quae in eo & canali intestinorum rite subiguntur, solvuntur, miscentur, mutantur & separantur. Hoc vero minus rite fieri poterit, ubi plus ingurgitatur, quam menstruum illud, ex glandulis & apicibus arteriarum & ex pancreate ac hepate adfluens, soluere potest; quippe prout in chemicis certa proportio quantitas inter corpus soluendum & menstruum soluens esse debet, ita etiam in laboratorio primarum viarum corporis humani pariter comparata res est.

§. XXI.

Neque vero solum quantitas, sed & qualitas cibi ac potus sterilitatem inferre potest. Ita esculenta

D

ex-

e) *Viçt. TRINCAVELLIVS, Consil. Lib. III. Consil. 10. & 75.* habet casus feminarum, a male affecto & frigido ventriculo sterilitatis labe affectarum.

exsucca, dyspepta, viscida, acida nimis & refrigerantia, quae aegerrime, nec unquam rite a ventriculo subigi digerique possunt, consequenter malum & crudum chylum praebent, ex quo minime talis sanguis generari potest, cuius flos in viris aequae ac feminis ad proliferationem aptus satis & idoneus foret, absque dubio, usu diuturno, mortales steriles reddunt. Eadem de nimia spirituosorum potuum ingurgitatione valent. Vnde GALENVS, in *Lib. quod animi mores corporis*. &c. ex PLATONE demonstrat, hominibus in vino delinquentibus, ut ebriosis, semen inutile reddi; & ARISTOTELES *Lib. III. Probl. 4.* semen ebriosorum magna ex parte infocundum dicit. Hanc ob rem HIPPOCRATES *Libr. de Superfoetat. §. XI.* coniuges ad Veneris sacra accessuros, si ea ex voto succedere velint, sic admonet: *Mulier ipsa, cum ad virum accedere oportuerit, ieiuna sit: vir autem non sit ebrius.* Recte ergo PROPERTIUS *Lib. III. Eleg. 15.* de Baccho sic canit:

Tu potes insanae Veneris compescere fastus.

Quod si vero omnes potus species examinare vellemus, in amplissimum nobis excurrendum foret campum. Sunt, qui fuscum illud & fere iam vulgo familiare infusum fabarum Coffée atro lapillo notant, & qua nervis inimicum, Veneris stimulos extinguens euiransque, illis dissuadent, qui sterilitatem magis, quam Venerem timent. At quam innocens hoc respectu hic potus moderate sorbillatus sit, quotidiana

eui-

euincit experientia *f*). Nec de potu infusi Theae alia nobis est sententia, nisi toto die, vt quorundam fert consuetudo, sorbilletur; tum enim radicale vitae fomentum destruere adserunt Medici Sinenses, teste K A E M P F E R O, *Fascic. III. Amoenit. exotic. Obseru. 13.* Nec desunt, qui vsum herbae Nicotianae homines emasculare statuunt, quo metu inductus olim *Amurathes IV.* Turcarum Imperator, edicto capitali vsum tabaci subditis suis interdixit, rationem legi subtexens, quod is prolis multiplicationem impediat, referente V I G E N E R O *Lib. de ritibus legibusque Turcar.* At, quam sterilis hic sit metus, tabacini fumi amatores horumque posterii testabuntur.

§. XXII.

Dum de iis, quae in ventriculum ingeruntur, verba facimus, adiicienda quaedam eorum existimauimus, quae, ex fonte pharmaceutico depromta, per eandem viam regiam corpus nostrum subeunt. Plurimos mortalium nimia medicatione corpora sua destruere, & saepe in secunda valetudine, praeferua-

D 2

tiuis,

f) Clariss. Dn. D. PLAZ, in Dissert. de potus Cofe abusu, catalogum morborum augente, §. XVII. organis generationis infensum esse existimat istum potum, eneruando eadem & tono iusto priuando; sed hoc de iis intelligit, vt §. XII. innuit, quibus non solum dies, sed & hora, quam sine Cofe vsum transigunt, perdita videtur, quos aequae ac aliis potus generibus abutentes, effeminatorum catalogo adscribi non negamus, si effectus testetur.

tiuis, vt dicunt, remediis abutendo, aduersae praesidia consumere, & priscorum & hodiernorum Medicorum obseruationibus constat. Iam HIPPOCRATES, *Lib. I. de morb. mulier. §. 27. contingit*, inquit, *& hoc plerisque, quum debiles existentes uteri, ab affectione macilenti fiunt: aut prae medicamentis, & fomento multo, genituram ferre non possunt.* Id quod in plurimas delicatulas femellas hodierni quoque seculi quadrat, quae prae nimio vsu medicamentorum aegrotant. Vt nihil dicam de iis, qui, dum vel ob naturalem corporis debilitatem, vel aetatem iam declinantem, Venus ipsis languet, largo aphrodisiacorum vsu eandem excitare, & quasi naturae vim inferre volunt; at fallunt hi ut plurimum & falluntur, siquidem natura sese facile cogi haud patitur. Ceterum non solum apud veteres, sed etiam apud superioris seculi Scriptores medicos, magnus recensetur pharmacorum, sterilitatem inducentium, numerus, sub titulis, coitum, venerem, vel erectionem virgae impredientium, sperma exsiccantium, vel etiam impregnationi & conceptui officientium, sub varia forma, potionum, fotuum, vnguentorum & amuletorum, descriptorum; quae vero ut plurimum superstitionem & fabulam sapiunt, vel si quid omnino ad sterilitatem faciunt, id fit indirecte, humores corporis refrigerando, spiritus vitales obtundendo, &c.

§. XXIII.

Petuntur autem cacopharmaca illa ex omnibus naturae regnis, quorum ex Veteribus tantum quaedam tangenda duximus, vt videatur, in quantum ab
illis

illis sterilitas metuenda sit. Ita PLINIVS tali virtute pollere scribit, abrotanum, agnum castum, cicutam, helenium, nasturtium, satyrionem, portulacam, falicem, &c. ex regno animali, corium & vngues lyncis, fimum muris, cineres stellionis, testiculos canis, cutem superiorem testudinis, vrinam propriam hominis cum vrina canis mixtam, quae omnia in viris venerem extinguere, vel impedire autumat; sic etiam in feminis eadem vi agere tradit, asplenon, clymenum, filicem, mentham, nymphaeam, apium, rutam, &c. DIOSCORIDES vero & SERAPIO, imprimis autem AVICENNA, vim sterilificam adscribunt allio crudo, aquae valde frigidae, calaminthae montanae, coriandro, farinae fabarum, pyrethro, polio montano, rosae, camphorae, cyclamini, piperi post coitum supposito, foliis populi, hyssopo, lapidi in ventriculo vel corde cerui nato, coagulo leporis, scolopendrio & sexcentis aliis. Horum vestigiis insistens ALBERTVS M. insignem, pro credulitate sua, tradit lapidum amuletorumque, Venerem inhibentium, catalogum, quo refert lapidem Gelosiam, Iaspidem, Sardonicum, Sapphyrum, Smaragdum, Oritem, quibus omnibus virtutes venerem prohibendi, castum & pudicum reddendi, & tempore coitus appensis, impraegnationem impediendi, adscribit; sed sit fides penes auctorem.

§. XXIV.

Interim non est inficiandum, dari nonnulla pharmaca, quae, si immoderate exhibeantur, Veneri officere possunt. De *nitro*, aestus sanguinis domitore,

haud desunt observationes, largiorem eius usum non solum libidinem moderare g), sed & diutius continuatum, penitus extinguere, quod facit partim labefactando tonum primarum viarum, partim refrigerando & crasin sanguinis destruendo. *Camphoram* quoque cum Veteribus nonnulli recentiores vel per solos nares adtractam eurare, volatilitate sua spiritus dissipando, crediderunt. At docet hodierna praxis, eius usum internum & externum non adeo ex hoc capite extimescendum esse. Num vero maiori in quantitate exhibita, aliquam vim antaphrodisiacam habeat, hoc cum Celeberr. SCHVLZIO, in *Thes. de mat. med.* experientiae suffragiis commendamus. Porro & *narcotica Venerem* reprimere, inprimis vero *opium*, cum ceteris corporis motibus, venereos quoque stimulos sedare, plurimi putant. Contrarium vero de eo nobis Itineraria Orientalia probant, dum referunt, Turcas opio scopo aphrodisiaco frequentissime pro voto uti; de quo vide plura in WEDELII *Opiologia*. Quod autem *emmenagoga* utero muliebri grauem maculam inurere possint, extra dubium est. Nec immerito huc referenda sunt remedia *nimis adstringentia*, diu continuata, saturnina, inuiscantia h), item balnea, iniectiones, infusus, & lotiones illae

g) vid. Casum LII. *Baldas. Timaei* a GÜLDENKLEE, *Opp. Med. pract. L. III.* viri nimium quantum salacis, usu nitri, a TIMAEO exhibiti, ita demum deferuescentis, ut uxori demulcendae vix sufficeret.

h) Ita laudatus ET TMÜLLERVS, *loc. cit.* omnia, quae spiritus

illae adstringentes, quibus femellae virginitatem renouare student.

§. XXV.

Medicamentis pharmaceuticis liceat adnectere operationes chirurgicas, quae maiorem forte sterilitatis metum adferre possunt. Huc spectat *herniotomia* & *lithotomia*, quae, inprimis in viris, si ab incauto & imperito Chirurgo peragantur, facile vesiculas feminales prostatamque destruere possunt, maxime si in perinaei regione operationes hae administrantur, ut quidam recentiorum commendant. Sic etiam *catheteris* frequens, vel incauta applicatio, & *pessorum* imprudens adhibitio, ansam sterilitati praebere possunt. Huc denique quam maxime facit *partus laboriosus* nimis, & qui fit contra naturam, ubi uterus variis instrumentis effringi, vel infans ab imprudente, inexperto artisque suae minus gnaro chirurgo sectione caesarea educi, vel etiam frustillatim extrahi debet, quo tempore facillime uterus destrui penitus & ad conceptionem inhabilem reddi posse, per se patet. Nihil dicam iam de vitiis, quae in utroque sexu post curationem incautam gonorrhoeae, fluoris albi, aliorumque morborum partium genitalium, nonnunquam remanent ac generationem impediunt.

§. XXVI.

ritus animales figunt, seminis generationi obicem ponere docet, v. g. acida, vitriolata, nitrata, itemque nimium mercurii viui internum & externum usum sterilitatem producere autumat.

§. XXVI.

Post victum inordinatum, pharmacorumque intempestivum & imprudentem usum ac adplicationem, meretur attentionem *motus corporis immodicus, & diuturna quies*: Quippe

*Cernis ut ignavum corrumpant otia corpus,
Et vitium capiant, ni moveantur, aquae.*

Etenim nimia quies, vitaeque otiosa ac sedentaria, imprimis cum lautiori victu coniuncta, corpora obesa, torpida & imbecilla reddit, humores lentos, spissos & viscidos efficit, secretiones & excretiones impedit, atque prout innumeris morborum insultibus, ita & sterilitati ansam praebet. Videre hoc est in lautioris fortunae, & vitae delicatae otiosaeque addictis mortalibus, quorum plurimi non solum morbosam, sed & sterilem ducunt vitam, cum alii, qui labore & motu corpora firmant, & sanitate fruuntur optata, & sobole beantur numerosa. HIPPOCRATES *Lib. de aëribus, aquis & loc. Sect. XLVII.* refert de Scythis, eos propter desidiam perpetuam crassos carnososque ac pingues reddi; masculi enim eorum, antequam potentes fiant equos conscendere, plurimum temporis in curribus desident, raroque prodeunt, ut ambulent. Muliebrium autem corporum formas ad miraculum usque fluxas existere scribit, subiiciens demum *Sect. seq.* *Neque vero possibile est, foecundam esse eorum naturam, cum viri minime cupidi sint cum feminis commisceri, ob nimiam corporis liquiditatem, ventrisque molliem ac frigiditatem.*

Et

Et paullo post de feminis: *Mulieres pinguedo carnis & humiditas steriles facit, prae quibus uteri earum genitale semen nequeunt continere. Lunares namque purgationes eis non eueniunt, quemadmodum est necesse, sed minus & intempestiue per longius tempus. Ipsumque amplius uteri os prae pinguedine concluditur, ut nequeat semen suscipere. Addit denique rationem: Sunt enim otiosae & pingues, ventresque earum frigidi & molles, unde necessario sequitur, non multum foecundam Scytharum gentem esse. Contrarium statim, de famulis ancillisque Scythicis, hisce subiungit, has viris misceri plurimum gaudere, in uteroque conceptum continere, propter corporis exercitium frequens.*

§. XXVII.

Pari modo excessus in motu, immoderataque corporis exercitatio, artus delassando, spiritus viresque vitales exhauriendo, & toti corpori rigorem, marcorem, debilitatemque conciliando *b)*, causam sterilitati suppeditare solent. Testatur id laudatus Senex, *loc. cit. Sect. 50.* Scythas equites ab equitatione diuturna articulorum doloribus corripiri & euirari,
E scri-

- i)* Confirmat hoc supra laudatus PLATNERVS, dum l. c. §. VIII. *Nimio motu, inquit, succi illi dissipantur exhauriunturque, qui in cerebro in sic dictos spiritus versi, per nervos in omne corpus, ad praestandum sensum motumque, diuiduntur; his defectis nerui, & inter hos ii etiam, qui ad cor atque pulmones pertinent, resolvuntur, &c.*

scribens, qui quando vxores adeunt, impotentesque se factos vident cum illis coire, induunt se veste muliebri, palam se euiratos esse confitentes, ad mulierumque contubernia transeunt, earum opera tractantes. Quae impotentia eorum quod non tam a venae sectione retro aures facta, quam ab excessu inequitatione ortum habeat, ipse HIPPOCRATES in sequentibus ostendit, his verbis: *Hoc itaque maloditissimi Scytharum afficiuntur, minime vero infirmi; immo qui maxime & genere, & potentia praevalent, ex nulla alia, quam continuae equitationis causa, hoc perpetiuntur.* Et Sectione seq. vltius scribit: *Vbi enim frequenter & continue homines equitant, ibi plurimi a diuturnis doloribus articularum, coxendicorumque maxime & pedum, corripuntur, ad coitumque fiunt impotentes.* Addit hac ipsa Sectione & aliam infocunditatis gentis huius causam, nempe *braccarum, sive femoralium angustorum genus, quod Scythae gerunt.* Sunt istae braccae sine dubio similes iis, quibus Hungari nostri, veri veterum Scytharum posterii, vtuntur. His vero utebantur strictis & angustis, crura partesque genitales firmiter continentibus, vt commodius & citra impedimentum possent equis insidere. Quo facto fiebat, vt testes organaque generationi inseruientia compressa, neque nutrirentur probe, neque augmentum caperent, sed vasis ad haec meantibus coarctatis & destructis, haec quoque contabescerent. Inde illa euiratio & sterilitas; id quod & nostris Hungaris pro cautela esse potest.

§. XXVIII.

Sed lustremus iam *excreta & retenta*. Neque enim ille, qui bene ingerit & probe digerit, sanus est, sed qui digesta simul rite excernit & egerit. Vti vero plurimorum morborum causae saepe sub vitio excretionis latent, ita & generationis impedimenta haud raro inde dependent. Nolumus hic longi esse in demonstrando, quomodo per impeditas secretiones & excretiones varius status morbosus in utroque sexu generetur, tota sanguinis massa, immo vniuersa corporis substantia, labefactetur ac vitietur, consequenter & sanguinis proliferi, & feminis secretio ac perfectio impediatur; verum conuertimus nos statim ad specialiora, ad illas nempe secretiones & excretiones, quae intra & circa partes genitales utriusque sexus fiunt. Quodsi in viris semen vel prorsus non, vel minori copia, quam opus sit, vel etiam vitiosum, gignatur & secernatur, aut in feminis nulla, aut paucissima menstrua excretio succedat, quemadmodum id contingit mortalibus habitus pinguioris, naturaeque calidioris, vel frigidioris, in quibus natura omnem materiem feminis proliferi in corporis nutritionem, aut pinguedinem conuertit, tum hos maxime sterilitatis labe adfectos esse, extra dubium est. At longe plures his sunt, quibus prouida mater natura hunc quidem thesaurum largita est, sed qui frequentibus foedis prostibulorum complexibus, vagaque venere illum dilapidantes, sese ita exhausserunt, ut cum tandem ad legitimi thori usum accedunt, steriles & impotentes suspirent, tristi saepe

memoria intempestive profusi genitalis thesauri in mentem reuocata; verum, fera haec turpis facti poenitentia eiaculata tela non reuocabit amplius, nec organa, per turpes morbos exinanita ac destructa, in auitam restituet integritatem. Valent haec & de mulieribus in Veneris palaestra strenue exercitatis, quippe quas frequenti in hoc certamine congressu aequae sterilesceere posse, immo steriles reddi, docent exempla illarum, quae quaeustum corpore exercent. Confirmat hoc & *Alex. MASSARIAS*, in *Praelect. de morb. mulier. concept. & part.* dum *Cap. VI.* dicit: *Et quoad coitum, certum esse debet, mulieres quo frequentiores coeant, eo esse steriliores.* Vnde *HIPPOCRATES Lib. de steril. Sect. XI.* monet mulieres, ut si genituram se concepisse cognouerint, ne amplius ad virum accedant, sed quiescant.

§. XXIX.

In feminis porro menstruationis quoque negotium attendi meretur. Quod si enim vel plane non, vel nimis tarde & inordinate menstrua procedant *k)*, teste *HIPPOCRATE*, feminae non concipiunt. Hinc

k) *ETTMÜLLERVS, loc. cit. P. III. Cap. I. & II.* causas emanationis mensium, hincque ortae sterilitatis, statuit esse vel in ipso utero & vasis eius, vel in sanguinis excernendi vitio. Prius fit, dum vagina uteri obstructa & mucilagine pituitosa infarcta est, &c. Posterius vero fieri dicit a cruditate, crassitie ac visciditate massae sanguineae; hanc vero oriri a cruditatibus stomachi acidis, &c.

Hinc *Lib. de steril. Sect. IV.* diuus Senex expressis verbis scribit: *Si vero mulieri menses non prodeant omnino, aut ab omnibus relatis, etiam sic non concipit: vendae enim sanguine plenae genituram non suscipiunt: & in uteris aliquid inueterati sanguinis inesse necesse est, quod genituram nutriri prohibet: si vero pauciores, quam debeant, menses prodeant, neque sic praegrans fit.* Et supra §. XXVI. allegato loco, hanc causam reddit sterilitatis feminarum Scythicarum, quod lunares purgationes eis non eueniant, quemadmodum necesse est. Non quidem nos latent relationes & obseruationes, de Brasiliae, Grönlandiae, borealiumque regionum feminis, quae raro vel nunquam menstrua patiuntur, felices nihilominus matres existentes; at haec, aliarumque feminarum, nunquam soluto menstruo vectigali parientium, exempla, vix derogabunt quicquam regulae illi Hippocraticae, peculiaris quippe corporis fabrica, cui privilegium illud tribuendum, in his latere potest, ut existimat Illustr. HALLER, in *notis ad Prael. Boerhaau. ad §. 667. not. f.* Prouti vero defectus, ita & excessus excretionum menstruarum impraegnationem impedire potest, partim uterum nimis humectando relaxandoque, partim susceptum semen extinguendo, eluendo, vel etiam embryonem copioso adfluxu excutiendo. Vnde HIPPOCRATES *de steril. Sect. IV.* *Et si quidem, inquit, mulier multos menses demittit, sterilis fit.* Huc quoque referri possunt nimius haemorrhoidum fluxus, haemorrhagiae nimiae, frequentes deiectiones dysentericae, quae

utrique sexui sterilitatis labem inferre possunt. Ut taceam pollutiones nocturnas, siue eae voluntariae, siue inuoluntariae sint, gonorrhoeam, fluorem album, pruritus & fricationes, quae omnia saepe sterilitati ansum praebent; fonticulorum vero fluxum non adeo extimescendum puto, ut nonnullis videtur.

§. XXX.

Dicendum iam foret de *immoderato somno & vigiliis nimis*, corpora mortalium consumentibus vitalesque spiritus dissipantibus; sed quae §. XXVI. & XXVII. de quiete & motu dicta sunt, de his quoque valent. Restat ergo ut de *animi pathematibus*, quae aequae §. XVI. tetigimus, quaedam adiiciamus. Haec uti mortales frequenter exercere solent, ita saepissime causa sterilis matrimonii sunt. Iam Stoici, in causas sterilitatis inquirentes, eas in dissensu inter virum & feminam omnes complecti statuebant, cuius dissensus fundamentum docebant latere vel in corpore, si alter coniugum sit pusillus, alter grandior, qua ratione genitalia instrumenta nullo modo possunt bene cohaerere: vel in incongrua corporis temperie ac temperamentorum nimia contrarietate: vel porro in animorum morumque diuersitate, vel denique in aetatis, gentis, ac victus discrepantia nimia. Et sane ex his principiis dissidia, odium, moerorem & zelotypiam, coniugum animos discruciantes thorumque infoecundum reddentes affectus, oriri, quotidiana testatur experientia.

§. XXXI.

Tandem & malam corporis artuumque conforma-

formationem, morbos item acutos & chronicos, articulorum & neruorum affectus vehementes ac diuturnos, mala, viscera afficientia & vires corporis depascentia, plerumque sterilitas comitatur *l*). Nihil dicam de grauibus iniuriis & laesionibus externe corpori illatis, contusionibus, vulneribus, vlceribus ac fistulis, imprimis in regione organorum generationi inseruientium profundius penetrantibus, quae omnia quam facile foecunditati officere possint, multorum tristia exempla testatum reddunt. Atque haec de vniuersis illis morbis & affectibus corporis internis & externis valent, qui illud vel totum affligunt, vel per sympathiam partes genitales in consensum trahunt, nullo respectu habito ad sexum.

§. XXXII.

Ceterum vt hanc partem de caussis sterilitatis finiamus, illud reliquum est adiungere, an & *maleficiis*

- l*) Testatur id quoque FERNELIVS, dum *Lib. VI. cap. XVII.* steriles ut plurimum fieri scribit eos, qui cum morbo acuto, vel diuturno, humores deprauante & spiritus principes offendente, conflictantur; qui viscerum latente vitio, intemperie, obstructione, scirrhus laborant; quique cachexia, vel leucophlegmatia, ictero, vel lenta febre corpus extenuante, vel cacochymia affecti sunt, addens rationem, quod viri his malis obnoxii semen non proferant, vel prorsus euaniidum & languidum: feminae vero ita affectae semen utero non concipiant, conceptum non foueant & nutriant, sed extinguant, &c.

ciis magicisque incantamentis ea possit mortalibus inferri. Id fieri posse non solum credulum vulgus persuasum sibi habet, sed & plurimi veterum ac superioris seculi Medicorum idem statuebant, plurimis observationibus de fascino, nodis ac ligationibus, quibus eorum scripta scatent, hoc testantibus. Rident vero haec hodie oculatiores naturae scrutatores, acutioresque rerum, quae in mundo fiunt ac fieri possunt, iudices, nec immerito. Neque enim daemone, vel hominibus cum hoc, ut putatur, commercium habentibus, tanta est in corpora mortalium potestas, ut illam, quam Creator illis ad speciei suae conseruationem benigne indidit, generandi virtutem extinguere, artibusque suis sufflaminare possent. Omnes itaque illos nodos in filo, vel vestibis neosponsorum tempore nuptiarum factos, clausas feras *m*), cultros inuersos, vel parieti infixos, sexcentasque huius generis superstitiosas, quae tempore copulae sacerdotalis, vel nuptiarum, a vetulis vulgus sibi metuit stultitias, nihili facimus, certo persuasi, si nullum vitium internum vel externum in corporibus coniugum, & imprimis in partibus genitalibus latet, & mutuus consensus ac amor coeuntium adest, nisi ipse Deus imperscrutabili modo iis benedictionem suam differre, vel denegare velit, aut utrum mulieris claudat, ut Sarae vel Elisabethae, nullam daemonum instrumentorumque Satanae prohibere,

m) vid. ETTMÜLLER, *loc. c. Cap. XVI.* & HELMONTIVS *de Curis magn.* IOEL, *Tom. IV. Lib. VII. Sect. I. c. 6.*

hibere, aut impedire posse, quo minus vota coniugalia adimpleantur. Nec mouent nos exempla a superstitiosis & credulis illis obseruatoribus adnotata, qui rerum physicarum, & inprimis anatomiae corporis humani ignari & rudes, si nullum externum in corpore vitium cernebant, nihilominus tamen coniuges steriles esse videbant, mox causam fascino & incantationibus adscribebant. At saepe quae mentis & oculorum Medici acies adsequi non potest, cultri anatomici detegit acies; immo etsi haec non de-regeret, satius est corporis & animi singularem constitutionem, vel vitium in vasculis horumque structura intricatissima, subsumere, quam ad aniles eiusmodi fabellas concludere. Interim quod lenta venena, philtro poculaque sic dicta sterilitatis, corpus adfligere, eneruare, sicque hominem sterilem efficere possint, non inficiamur, at hoc veneficium est, non fascinum.

§. XXXIII.

Haecenus de causis sterilitatis in genere. Ordo iam, quem supra nobis proposuimus, monet, ut ad eas transeamus inquirendas, quae in specie in hoc vel illo sexu infoecunditatem producere possunt. Id quod sine mora praestabimus, singulas partes generationi inferuientes nunc indagaturi, quibus illae vitiiis morbisque, foecunditati officientibus, sint obnoxiae. Prodeat ergo primum mas, cui praeter probum corporis habitum, ad celebranda Veneris sacra necessaria sunt vasa spermatica integra, membrum principale penis & testes, sufficiens denique & quantitate,

titate, & qualitate materia, seu liquor seminalis. Vasa, sunt thesaurum genitalem secernentia, praeparantia, adseruantia & excernentia. In elaboratione & perfectione attendi merentur vasa memorata spermatica cum nervis, testiculi cum epididymidibus & vase deferente, harum denique partium inuolucrum, scrotum, cum cremastere musculo. Primum, quod ad vasa spermatica attinet, haec per longam viam, arteriae nempe ordinarie ex aorta sub emulgentibus prodeuntes, venae vero, dextra ad venam cauam prope renes, sinistra ex renali sui lateris, aut emulgente, ad testes procedunt, hisque secretam, sed adhuc rudiorum genituram ad perficiendum tradunt, quae si deficient in aliquo mortalium, plenariam, connatam & incurabilem ei inferunt sterilitatem, qualem casum habent *A.N.C. Dec. I. Ann. III. obs. 113.* Ita etiam si arteriae istae iusto minores & teneriores sint, ut sufficiens quantitas floris sanguinis ad seminis secretionem aduehi nequeat, vel arteriae aequae ac venae, quae per varias anastomoses sibi inuicem iunguntur, corpusque pampiniforme pyramidale constituunt, compressae, obstructae, vel in morbis testiculorum ac scroti, inflammatae, exulceratae, scirrhosae, vel in operationibus destructae, sint, vel etiam cirsocele laborent, pari ratione virum impotentem ac sterilem efficiunt. Ne dicam de subtilissimis lymphaticis, quae pariter suos manes pati possunt. Sic quoque si nervi, ex vicinitate huc accedentes, debiles nimis, vel iusto pauciores, obstructi & paralytici sint, idem malum inducent. Vti vero haec difficul-

ficulter deteguntur, ita ostendunt, quam occultae saepe causae sint minus foecundi thori conjugalis.

§. XXXIV.

Testiculos deinde, & his superincumbentes parastatas, variis vitiis saepissime adfici, nemo inficiabitur. De structura eorum, an glandulosa sit, an vasculosa, an plane singularis, lites Anatomicorum nostras hic non facientes, notamus, plenarium testium defectum sterilitatem omnino inferre, prout hoc castrati spadonesque suo exemplo docent, quippe qui cum TIBULLO *Lib. IV. carm. 13.* merito canunt:

Nam licet e coelo mittatur amica Tibullo,

Mittetur frustra, deficietque Venus.

De spadonibus interim, quos nonnulli ab eunuchis distinguunt, non desunt exempla, eos post exsectos virilitatis testes cum successu coitum celebrasse, id quod Illustr. HALLER, *in not. ad Prael. Boerhaav. ad §. 649. not. l.* pluribus casibus, ex observatoribus antiquis & recentioribus allegatis, illustrat, sed simul addit,tribuendum hoc esse penui seminis foecundi, cuius post castrationem tanta adhuc copia in vesiculis feminalibus remansit, quanta ad vnum & alterum coitum sufficere potuit, sed posthac manum de tabula. Citantur quoque ab Observatoribus exempla virorum, quibus nec ars, neque mars hunc appendicem abstulit, sed ipsa nouerca natura subtraxit, qualem casum habet SCHENCKIUS, *Lib. IV. de testic. obs. 2.* at caute circa hanc rem mercandum arbitror, neque statim ex apparente absentia testi-

culorum vir pro sterili pronunciandus, quoniam saepe in abdomen retracti, & circa interiora processus peritonaei absconditi latent, notante Illustr. HALLE-RO, *l. cit. ad §. 641. not. cc. ibique citatis*, & nonnunquam in adultis casu prolabuntur ac in scrotum descendunt, vti nuper Clar. Dn. D. QVELMALTZ in *Programmate, de serotino testium descensu, eorumque retractione*, docuit. An vero ab hac occultatione vel retractione sterilitas dependeat eorum, in quibus testiculi non adparent, dubium est. Certe ipsa retractio, a cremastere musculo contingens, nisi vas deferens inde aliquam iniuriam patiatur, (quod vero non aequè adeo facile fit, cum illud singularis structurae sit, ita, vt non facile comprimi vel distorqueri queat,) vix impotentiam siue sterilitatem inferret, neque etiam, si memorata testium in abdomine occultatio a connata breuitate fasciculi vasorum spermaticorum dependet, si modo sanguis & quantitate, & qualitate rite ac sufficienter adfluat. Quod si vero vel a spasmodicis quibusdam motibus in nervis & membranis, vel a nimio sanguinis in has partes adfluxu ac vasorum spermaticorum inde orta distensione & obstructione, abbreviatio illa seu retractio oriatur, forsitan aliquid incommodi in negotio generationis oriri poterit, si imprimis vasi deferenti simul vis inferatur. De reliquo, de eorum impotentia dubitandum non erit, quibus siue cultro, siue globi ictu, siue contusione, siue quocunque alio casu testiculi plenarie ablati sunt.

§. XXXV.

Illi autem inter impotentes referri nequeunt, quibus vel natura vnum tantum testiculum concessit, vel ars, aut infortunium alterutrum abstulit, cum hos satis foecundos esse observationes doceant. Ita Illustr. HALLER, *l.cit.* §. 641. not. c**. de Heluetis, apud quos frequens est, ob hernias, castratio, eos monorchides, pueros & puellas promiscue generare refert, & *Timaeus* a GÜLDENKLEE, *Opp. med. pract. Lib. III. Cas. XLV.* habet exemplum monorchidis, qui nihilominus XV. liberos utriusque sexus genuit. Vid. etiam *A. N. C. Cent. I. obs. 191. & Dec. II. Ann. III. obs. 66.* itemque *Dec. I. Ann. XIV. obs. 13.* Multo minus polyorchides vitii sterilitatis arguere fas est, nisi illi, stimulis venereis nimis obnoxii, libidini indulgendo sese emasculent. Atque haec de situ & numero testiculorum; iam considerata eorum magnitudo. Haec pro diuersitate subiecti aetatisque varia est; interim absque dubio maioribus testiculis pollens magis strenuum se exhibet in Veneris palaestra, eo, qui minoribus praeditus est, modo non sint iusto maiores, ut naturam tumoris induant, vel scirrhus occallescant, tum enim prius ex pumice aquam expresseris, quam ex iis semen, nisi iterum emolliantur; quamuis & tum saepe adhuc anguis in herba lateat. Est enim structura testium adeo tenera ac sensibilis, ut facile, quo semel imbuuntur odore, seruent diu. Ex hac structurae consideratione quoque elucescit, quam facile iniuriae externae, ut frigus, collisiones, adtritibus, vulnera, ulcera &

fistulae eos destruere, sicque sterilitatem inferre possint, uti id iam notauit *CELSVS de re medic. Lib. II. Cap. 18.* & *LOMMIVS Observat. med. Lib. II. p. m. 226. seqq.* ut taceam inflammationes eorum, gangraenam & sphacelum, successiuamque contabescentiam. Quod vero ex testiculis osseis & cartilagineis, quales describuntur in *A. N. C. Cent. I. obs. 30. & Dec. II. Ann. X. obs. 136.* non medulla speranda sit, per se patet. Ceterum status quoque varicosus, quem supra in vasis spermaticis accusauimus, in testiculos etiam & parastatas, cum vase deferente, cadit, quod ultimum, inprimis semine nimis turgidum, talem statum varicosum nonnunquam mentitur, id quod obstructionibus aliisque incommodis, consequenter & sterilitati, ansam praebere potest. Atque haec, quae hactenus de testiculorum vitiis dicta sunt, tum ob vicinitatem, tum ob structurae similitudinem, ad epididymides & vas eiculatorium quoque adplicari possunt.

§. XXXVI.

Sed transeamus a nucleo ad corticem, siue *scrotum*. Videtur primo intuitu hoc inuolucrum parum aut nihil ad foecunditatem potentiamque virilem conferre, nisi quod aërem a sensibilissima testiculorum fabrica arceat. Verum si primo musculum cremasterem scroti, qui diffusis fibris suis testiculos, sacco quasi musculofo complexos, sustinet, consideres, aduerteres hunc in Veneris exercitio testes versus radicem penis admouendo, & compressione eorum feminis eiaculationem adiuuando, plurimum ad
gene-

generationem conferre, consequenter si hic vel resolutus, vel quomodocunque debilitatus ac vitiatus, hoc munere suo fungi nequeat, facile generationi officere potest. Deinde non minorem attentionem merentur varii tumores, quibus scrotum ipsum nonnunquam sedem praebet, quales sunt, hernia scrotalis, pneumatocele, hydrocele, sarcocoele, alique, qui omnes si in insignem molem, uti saepe fit, excrescant, coitum impediendo, ut notat immortalis memoriae BOERHAAVIUS, in *Praelect. ad Inst. rei med.* §. 641. sterilitatem producant. Saccus enim iste ita saepe, his vitiis affectus, distenditur, ut membrum virile totum tumore abscondatur, retrahatur, vel ad minimum distorqueatur, eiusque erectio aboleatur.

§. XXXVII.

A scroto conuertimus nos ad lustrandas *vesiculas seminales n)*, receptacula illa secretae geniturae. Nolumus vero hic disputare, an in illis semen ulterius praeparetur, aut perficiatur, vel an oscula venarum resorbentium in iisdem hient, & abundans feminine liquidum ad massam humorum reducant: hoc tantum ponimus, nisi semine & quoad quantitatem, & quoad qualitatem ad impraegnationem sufficiente, vasa haec praedita sint, sterilem omnino celebrari coitum. Multo magis vero defectus harum vesicularum, vel destructio, obstructio, aliaeque iniuriae

n) Nimiam harum laxitatem & flacciditatem, cum orificiis in vrethram hiantibus, eiaculationem feminis laesam inducere, scribit ETTMÜLLER, *l. c. Cap. XV.*

riae iisdem illatae, generationem impediunt, idque vel ex eo, quod non facile vesiculae istae aliquo vitio laborent, quin & ipsum vas deferens, iis intime nexum, in consensum trahatur. Vt taceam hic illam gonorrhoeae speciem, in qua magma feminale ex his ipsis vesiculis infectis & exulceratis prodit, quod genituram quoque praeterlabentem inficit ac corrumpit.

§. XXXVIII.

Sistat iam se examini virga virilis, cum vrethra, glande, praeputio, corporibusque cauernosis. Non erit opus multis argumentis probare, quod plenarius penis defectus, siue is connatus sit, siue quocunque infortunio adquisitus, sterilitatem viro inferat, nisi quis vel ad observationes rariores, quae in P. V. R. MANNI *Chirurg. Lib. II. cap. 28.* aliorumque scriptis prostant, prouocare velit, de quibus tamen sit fides penes auctores; vel membrum artificiale in subsidium vocare, cum tamen tali eburneo, aut coriaceo membro ornatus mas tribadem potius, quam virum se praestare poterit: vel denique cum aliis statuatur, ad conceptionem non absolute requiri penis feminisque in vterum immiſsionem, adeoque conceptum sine geniturae iniectione fieri posse, quod vero aequae, ac impraegnationem in balneo, a femine, per virum prius in eodem balneante emissio, factam, inter fabulosas narrationes referimus. Non quidem minus membrum absolute ineptum ad generandum iudicamus; at, hinc non concludendum, quod, quia illud non penetrauit satis in vaginam, idcirco semen non

non potuerit substantialiter peruenire in aruum muliebri. Notum enim est, liquidum hoc plasticum non simpliciter effluere in motibus venereis, sed vi quadam iaculatoria proiici, vteri vero, oestro venereo correpti, orificium adpropinquare quasi ad semen suscipiendum & absorbendum: vtut difficile sit, in ipso actu venereo tales observationes instituire, qui, adserente iam DEMOCRITO, epilepsiae quaedam species est, vbi magnae in oeconomia animali turbae fiunt. Statuimus itaque, plenarium virgae virilis defectum plenariam omnino inducere sterilitatem, paruum vero membrum, si cetera rite se habeant, pro receptiuitate subiecti, non absolute impotentiam, licet tamen difficultatem impraegnationis, inferre posse, modo non plane sit signum pro signato. Pari modo gracilitas huius instrumenti respectiue tantum impotentiam, pro diuersa capacitate vaginae muliebris, infert, cum haec sese contrahendo in oestro venereo facile semet subtiliori quoque virgae accommodet, colemque amplectatur; nisi cum nimia gracilitate flacciditas simul penis coniuncta sit, vt hic neque inflari, neque erigi possit, tum quippe impotentiam adesse nullum dubium est. Prout vero in quibusdam breuitate tenuitateque, ita in aliis mole nimia membrum virile peccat, atque generationi impedimento est. Nam si virga nimis longa est, haud exiguum inde incommodum orificium vteri experitur, adeo, vt femina talem virum exhorrescat, neque lubens cum eo in Veneris vsum consentiat. At huic vitio forte mutua partium patientia

ac concordia, vel etiam ars mederi potest, nec statim quemquam propterea impotentiae, vel sterilitatis arguendum existimamus, quod naturam iusto benigniorem expertus est. Neque magni facimus vanum quorundam metum, qui cum ARISTOTELE, *Lib. I. de gener. anim.* aliisque veteribus, ideo longos penes infocunditatis damnant, quod in his semen, priusquam ad vterum penetret, in via refrigeretur; quam opinionem tanquam ineptam merito reiicit *Alexand. MASSARIAS, loc. cit.* Cum enim semen per canalem penis, qui & ipse tum aestu venereo calet, cuiusue caliditas a pudendo muliebri fouetur, transeat, videtur fieri non posse, ut illud refrigeretur, ut potius forte contrarium videatur, longum penem ad efficiendum conceptum aptiorem esse & accommodatiorem, quod sic semen sine loci & temporis interuallo protinus in vtero deponatur. Quod si vero cylindri huius diameter vaginae muliebris diametrum multum superet, res inter illud par coniugum non caret suspitione thori sterilis; sed haec etiam sterilitas respectiva tantum est, immo saepe ad certum saltem tempus durans, donec nempe organa utriusque coniugum sibi inuicem se accommodent, nisi plane vir, & longitudine & crassitie membri sui omnem modum exsuperans, Herculis clauam repraesentet. Quid si non modo molem, sed etiam vim multiplicatiuam sui in semet ipso membrum hoc ostendat? ut BARTHOLINVS *Inst. anat. Lib. I. cap. 24.* & SCHENCKIUS alique obseruatores de duplicatura & triplicatura penis idem notarunt.

Rarior

Rarior hic casus non facile diiudicatur, nisi ipsa oculari inspectione, tum vero a prudenti Medico iudicium ferri potest, an vnum alterumque ex pluribus illis membris ad coitum aptum sit, nec ne.

§. XXXIX.

Ludit saepe natura prout in aliis rebus creatis, ita & in corpore humano formando, non solum artus membraque multiplicando, sed & dislocando. Sic laudatus SCHENCKIUS *Lib. IV. obs. 1. & 2.* de pene e capite propendente, alii ex aliis corporis partibus, historias referunt; atque de talium subiectorum foecunditate aut sterilitate quid sentiendum sit, contemplatio eorum docet. Interim quod ab ex-crescentia tali peniformi, alio in loco, quam in monte veneris facta, parum aut nihil in negotio generationis sperandum sit, si non certum, tamen probabile admodum est. Requiritur vero in viro non tantum membri debite proportionati praesentia, sed etiam ut illud illecebris Veneris iusto tempore ac ordine aurem praebeat, debito modo erigatur rigidumque fiat ac aptum ad adplicationem horis locisque consuetis. In hac re duplex potissimum vitium generationem impediens occurrere potest: primum si plane non o), aut languide erigatur, quod vel a para-

o) ETTMÜLLERVS, *loc. cit. Cap. XVI.* laesae erectionis penis triplicem adducit causam, 1) spirituum animalium defectum, non contrahentium musculos, quibus non contractis, venula laxatur, penisque flacc-

G 2

scit,

paralyfi, vel alia muscutorum erectiorum laesione, vel a debilitate quadam siue vniuersali totius corporis, siue particulari neruorum, vel denique a defectu seminis probi ac viuidi, aliisque casibus, dependet. Idem vitium erectionis adest, vbi radix penis in dorso non satis valide ad symphyfin ossis pubis adprimitur, sicque refluxus sanguinis per venam dorsalem non impeditur; immo & in ipsis corporibus cauernosis causa latere potest, de qua tamen infra plura dicentur. Frequentissime vero causa procatarctica flacciditatis & frigiditatis virgae virilis latet in Veneris abusu. Viri enim nimis frequenter concumbentes, teste

GALE-

scit, id quod euenit, quando musculi, vel nerui, genitalibus partibus famulantes, sunt affecti, aut paralytici, hocque accidit vel a nimia equitatione, vel a casu super os sacrum, vel percussione circa partes vicinas. Sic quoque laesio capitis, eiusue vulnera, penis erectioni officiunt, teste HILDANO, *Cent. VI. obs. 59.* 2) quando spiritus animales in motu suo perturbati sunt, vel etiam mens turbata, vt in pudibundis, terrefactis, pauidis: Sic qui ad melancholiam hypochondriacam inclinant, propria imaginatione decepti, se impotentes putant; 3) deficientem stimulum, ex defectu, vel vitio seminis, conf. *Fr. IOEL, Opp. Med. Tom. IV. Lib. VII. Sect. I. cap. 6.* qui & cordis debilitatem, neruorum & arteriarum vasorumque spermaticorum obstructionem, renum insignem refrigerationem, causis impotentiae adscribit.

GALENO, *Lib. I. de sem. cap. 16.* fiunt steriles magna ex parte; assiduis quippe coitibus totum semen exhauriunt, corpus vitali spiritu priuant, vires eius, cum puriore optimi sanguinis parte, dissoluunt ac dissipant, quo facto totum corpus languere, frigescere, & consequenter sterilescere oportet. Immo & ipsa nimia in libidinem propensio, vehementesque imaginationes venereae, pollutiones nonnunquam feminisque fluxum vel inuitis inducentes, idoneae sunt ad vires vitales dissoluendas sterilitatemque inferendam, quales observationes sistunt, VENETTE, MONTAGNE, SALMVTHVS aliique; ex nimia quoque verecundia Illustr. STAHLIVS impotentiam in viro notat. Nihil dicam de abusu aphrodisiacorum, diureticorum, vel etiam incauto vsu mercurialium remediorum, sterilitatem plerumque, teste Illustr. ALBERTI, in *Iurispr. med. Cap. II. §. XXIII. not. m.* inferentium. Interim non ignoramus esse viros, qui languenti ac flaccido peni mediante instrumento eburneo, ad id inuento, auxiliatrices manus ferri, sicque sterilitati ex hac causa mederi posse existimant; at cum non simplex membri virilis immisio, sed etiam vis quaedam muscularis eiactoria, ad semen in sinum vteri muliebris immittendum, requiratur, id quod vero tali instrumento vix, ac ne vix quidem praestabitur; merito hinc quoque de eius felici applicatione ac vsu, expectationi boni talis viri respondente, dubitamus, ut iam taceamus incommoda, quae in subiectum femineum inde redundant. Denique nec ipsa penis erectio vitio caret, quippe

saepe fit, ut ille rite erigatur ac intumescat, semen vero eiicere non possit, sicuti hoc FORESTVS alique Auctores practici in pluribus subiectis obseruatum habent *p*). Huc spectat satyriasis & priapismus, morbi penis spasmodici, in quibus hic & absque stimulis venereis, cum dolore erigitur tenditurque, nec non variae penis erecti distorsiones, & mox in hanc, mox in aliam partem incuruationes, ut ab Illustr. BOERHAAVIO *loc. cit.* §. 658. notatae sunt; de quibus omnibus sufficienter iam constat, quod sterilitati ansam praebere valeant.

§. XL.

Enumeratis haecenus in genere variis vitiis penem totum respicientibus, inspiciamus iam *urethram*, canalem illum ex fundo ceruicis vesicae ad glandem usque productum, cum variis suis lacunis & glandulis. Defectum huius plenarium obseruauit TVLPIVS *Lib. IV. cap. 36.* qui aequae ac colis absentia procul dubio sterilitatem inducit. In eo quoque potissimum sic dictum hermaphroditorum genus se prodit uti forex, clitoridem sistens, cuius magnitudo facile negligentius insipienti imponere potest, ut prope illam habeat, quippe cui nihil, nisi hic ductus, deest cum suo orificio; immo nonnunquam hoc quoque eam gaudere obseruationes docent, in quo casu
an

p) VESLINGIVS adducit virum, qui erecto pene in coitu genituram non potuit effundere, cui postea flaccescente membro, ad lenissimum contactum semen effluxit.

an tale subiectum pro potenti ac foecundo declarari possit, ocularis inspectio decidit. Vid. Illustr. ALBERTI *Iurispr. med. Cap. II. §. XXXI. seqq.* Sed licet adsit in membro virili iste canalis, vti a potiori adest, potest tamen ille vario modo exulcerari, con- crescere, calculis impactis, vel carunculis & cicatri- cibus inaequalis & angustior reddi, vel etiam obstrui, quae mala omnia vti vrinae, quae hanc viam com- muni nem habet, sic inprimis crassiori liquori genitali moram iniiciunt, vel etiam, praecclusa via, eius emis- sionem penitus impediunt. Maxime vero status vl- cerosus aut ichorosus glandularum in vrethra laten- tium, & prostatarum in fluxu illo impuro, quem gonorrhoeam vocant, semen inficere, deprauare ac sterile reddere potest. Ita etiam, si glandulae hae obstructae sint, vel in gonorrhoea, cuius sedes, teste Illustr. BOERHAAVIO; *loc. cit. §. 654.* in his esse so- let, destructae & erosae, dum nullum amplius semini vehiculum suppeditare possunt, generationem vti- que impediunt.

§. XLI.

In ipsa porro *glande*, quae praeputio suo mo- bili tegitur, eadem contingere possunt, quae de vi- tiis laesionibusque penis obseruata sunt. Quam ma- xime vero notari hic merentur vlcuscula illa cancro- sa, quae coronam penis in collo glandis nonnun- quam obsident, quippe quae non modo coitum im- pedire, aut saltem difficilem ac dolorificum reddere, sed etiam de maiori contagio venereo in ipso semine latente suspicionem praebere possunt, quod vlti- mum

mum haud raro ita glandem corrodit & absumit, ut ea, integra manente reliqua parte penis, decidat, cui quidem vitio plenariam impotentiam non adscribimus, si modo, post eius consolidationem, rite aperta maneat vrethra. Vbi vero huius orificium in glande non est apertum, ut SCHENCKIVS *Lib. IV. obs. 3.* casum adducit, vel illud in loco insueto ac incongruo, e. g. in latere patet, nec arte error corrigi potest, vitium hoc omnino sterilitatem infert, dum in priori casu genitura emitti plane nequit, in posteriori vero non in transversum vteri orificium, sed ad latera vaginae eiicitur, sicque ad locum debitum non peruenit: quod vitium saepe in ipso quoque fraenulo, glandem cum praeputio inferne connectente, latere observatum est, quippe si illud vel inflammatum, vel nimis paruum est, caput penis deorsum flectit, sicque situm orificii vrethrae debitum mutat. Idem malum euenit a chorda, totam virgam cum summo dolore ad inguina incuruante.

§. XLII.

Eadem impedimenta, quae de glande imperfecta adducta sunt, generationi ponit *praeputium*, si illud vel a natura, vel a morbo concretum fuerit. Dein nimia quoque praeputii longitudo haud parum generationi officit. De Ebraeorum & Turcarum filiis MVSITANVS in *Trutin. Chirurg. Tom. II. Cap. 50.* refert, iis praeputium ita excrescere, ut ob montrosam eius magnitudinem, nisi circumcidantur, ad coitum prorsus inepti fiant. Idem perhibet de Aegyptiorum & Arabum pueris VESLINGIVS, *Syntagm.*

Syntagm. anat. Cap. IV. Immo testantur obseruationes *HILDANI Cap. IV. obs. 81.* & *SCHENCKII Obs. med. Lib. IV. obs. 8.* etiam in Christianorum liberis nonnunquam id contingere. Merentur hic apponi verba, cum adiectis rationibus, *Clariss. Dn. D. Io. Frid. BAVERI*, qui in *Disert. de causâ foecundit. gentis circumcis. in circumcissione quaerenda, §. XVIII.* Omnes, inquit, quibus natura praeputia formauit iusto longiora, ad coitum plane esse ineptos; quod concubitus semper magno cum dolore & incommodo agant, quod glans penis laqueo quasi contorqueatur, & materia seminalis in cursu suo naturali impeditur, quo fit, ut spiritus euanescat, & coitus minus foecundus exerceatur: id quod confirmant *SCHV-RIGIVS, Spermatolog. Cap. X. §. 12.* & *Nic. VENETTE, de la Generation, Cap. III.* qui ita de hac re scribit: *Quelques hommes ont le prepuce si long, qu'ils ne sont pas disposés à se joindre amoureusement à leur femmes. La verge est importune en cet état, & elle ne peut communiquer sa semence, qu'elle ne soit evan-tée, & que par ce moyen elle ne soit pas capable de la generation.* Sed & nimia praeputii angustia hoc loco notari meretur: nam si ea tanta sit, ut supra glandem plenarie retrahi nequeat, *phymosis*; si non nisi ad mediam glandis partem, *capistratio* vocatur; immo nonnunquam inuolucrum hoc undique glandi adnatum quasi adhaeret, quae vitia plurimum ad impotentiam conferre possunt, non solum molestissimos dolores viro in coitu excitando, sed & seminis emissionem impediendo. Denique si integumen-

H

tum

tum hocce nimis breue, & ita retractum sit, vt colum glandis occupet ac stringat, fit *paraphymosis*, quod quidem malum non semper impotentiam infert, coitum tamen molestum ac difficilem reddere potest. Vnde laudatus Dn. D. B A V E R V S *loc. citat. §. XXXV.* in vnum contrahendo, quae de diuersis phymoseos speciebus protulit, *ad sobolem*, inquit, *procreandam inhabiles sunt, qui dictorum quodam laborant vitio*: & R O L F I N C C I V S *de part. generat.* dicit: *Vbi praeputium adeo est angustum, vt glans nequeat perforare, summa in coitu oritur difficultas: neque enim vrina, neque semen liberum exitum inueniunt.*

§. XLIII.

Quod ad sic dictos *infibulatos*, seu *impotentes temporarios ac artificiales*, adtinet, quales apud Aegyptios & Arabes olim frequentes erant, quippe hi populi, praecisa praeputii nimis longi parte pueris suis, reliquam eius portionem perforabant, & annulo transducto eorum castitatem custodire solebant, hosque *infibulatos* vocabant, & vbi demum adolescebant, coniugio aptos refibulabant; hos inquam nemo inter steriles referet, dum iis, sublato annuli impedimento, omnia rite respondent. Idem mos infibulationis veteribus etiam in sexu sequiori receptus erat, inprimis vero Nigris, qui ad virginitatem puellarum conseruandam, pudenda consuebant, alii traiecto per eorum labia annulo hoc praestabant: de quibus vid. Illustr. A L B E R T I *Iurispr. med. Cap. II. §. XXIV.* Non dubitamus, minorem fore

fore inter Christianos impotentium ac sterilium numerum, si & hi adolescentibus suis talia vincula carnis iniicerent. Tale quid vero illi vel praeter voluntatem experiuntur, qui per nimium aut impurum Veneris exercitium, tumorem illum crystallinum, *bullam crystallinam* dictum, sibi contraxerunt, qui nonnunquam eum tantum locum occupat, ubi praeputium fraenulo glandi adnectitur, interdum vero totum hocce inuolucrum, immo totum membrum virile. De corporibus denique vrethrae *cauernosis* valent ea omnia, quae supra de virga dicta sunt, quippe potiora illa vitia, quae de membri huius mole ac qualitate notata sunt, potissimum ab horum fulcrorum varia structura dependent. Hoc tantum hic addendum putauimus, quod ab inflatione & induratione eorum saepe oriatur morbus penis, *chorda* dictus, eandem varie distorquens, qui tumor si in vno latere tantum fuerit, virgam incuruatam reddit, tumque glans vel inaequaliter tenditur, vel plane flaccida manet, id quod sterilitatem inferre testatur Illustr. HALLER, *loc. cit. ad §. 654.* Simile malum metuendum est, ubi vrethra & glans vnice tenduntur, corporibus cauernosis flaccescentibus, eo, quod in hoc casu genitura debito cum impetu in sinum vteri muliebris spargi nequit, teste saepe laudato BOERHAAVIO *loc. cit.* Ceterum luxationem organi huius virilis non facile quisquam extimescendam habet, nisi os in ipsis corporibus cauernosis praeter naturam lateat, quale quid *Sim. PAVLLI Obs. med. physic. pag. 71.* adnotauit.

§. XLIV.

Interim contingere potest, vt, licet singula haec organa generationis virilia, suffragantibus etiam sensibus externis, rite se habeant, tamen vir labe sterilitatis laboret, & quidem vel ob dispositionem quandam occultam feminis, vel impropportionem temperiei inter coniuges, vel ob aliud latens in corpore vitium. Quaeritur vero hic, an certa feminis probi ac viuidi quantitas ad conceptum requiratur, an, vt alii autumant, non tam quantitas eius, quam qualitas foecundum faciat coitum, adeo, vt hac rite constituta, etiam minima eius portio satis efficax sit ad impraegnandum? Fatemur difficile esse, aliquid certi in hoc negotio determinare. Ipse Medicorum parens HIPPOCRATES, *Lib. de genit. §. 3.* alibique omnino respexit ad debitam quantitatem, & τὸ ὀλίγον accusauit *q)*, dicit enim ibi: *Quibuscunque iuxta aures venae sectae sunt, hi coeunt quidem, & genituram emittunt,*

q) ETTMÜLLER *loc. cit.* defectus feminis duplicem notat causam, alteram laesam generationem probi sanguinis, partisue eius chylosae, dulcis, pinguis, & generati consumptionem, vbi hic in corporis saginam a natura conuertitur, vel vehementibus animi corporisque laboribus, aut morbis diuturnis consumitur; alterum vitium testium, & vasorum fecermentium ac praeparantium. Et *Viët. TRINCAVELLVS Consilior. Lib. III. consil. 78.* notauit casus viro-
rum, a defectu feminis, pudendo resolutis, & imaginatione fortiori venerea steriliis.

tunt, verum modicam & debilem ac infoecundam. Existimamus igitur non plane negligendum esse hoc momentum; magis tamen respiciendum ad illos, qui, ut C O V S ait, debilem emittunt genituram; quae vero debilitas an ab eius cruditate r), vel defectu caloris & spirituositatis, an vero ab agonizantibus animalculis spermaticis dependeat, nostri non est hic decidere. Possunt certe ad hoc plurimum conferre omnes supra recensiti errores, in usu rerum non naturalium commissi, laesiones organorum secretioni & elaborationi seminis destinatorum. Et exinde etiam vitium eorum, qui loco seminis flatus per vrethram emittunt, yterumque muliebrem inflant potius, quam impraegnant, ortum trahere credimus.

H 3.

§. XLV.

r) Ab ea derivat *Alex. MASSARIAS*, in *Praelect. de morb. mul. Cap. VI.* hanc seminis debilitatem, causas adstruens cruditatis, 1) omnes res externas, quae corpora nostra possunt adficere & alterare; 2) vitia primarum viarum, in quibus improbae fiunt alimentorum concoctiones; 3) instrumentorum & vasorum seminalium insignem intemperiem, unde illa nequeant materiam foecundi seminis adtrahere, nec adtractam concoquere & praeparare. Ex his vero & reliquae causae, defectus nempe caloris & cruditatis liquoris seminalis, & vermiculorum spermaticorum debilitas, aut, ut *GEOFFROY Qu aest. medica: An hominis primordia vermis?* docet, defectus horum animalculorum, absque dubio oriuntur. vid. eius *Tract. de mat. med. Tom. I. pag. 128. seq.*

§. XLV.

Denique quod ad qualitatem feminis adinet, in ea diiudicanda aequae haud exiguae occurrunt difficultates, nisi ipse effectus de causa testetur, e.g. si a virulentia vel impuritate quadam, vel etiam aliis vitiis in eo latentibus, ipsa mulier sana ac bono corporis habitu pollens, post coitum male se habeat, variosque motus spasmodicos vel hystericos inde patiatur, aut etiam variae efflorescentiae, vel tumores in corpore eius adpareant; quae omnia latentium in femine vitiorum indubitata sunt indicia. Accusant certe omnes liquoris huius genitalis nimiam visciditatem aequae ac tenuitatem, seu aquositatem s); quod ultimum HIPPOCRATES iis proprium esse dicit, quibus nares humidiores sunt. Requiritur ergo ad coitum foecundum temperata quaedam geniturae consistentia, temperatus calor ac viuidditas, quae si non adest, sterilis omnino celebratur Venus. Modum excretionis thesauri huius genitalis esse debere eiaculatorium, supra innuimus, hinc quibus per modum stillicidii emanat, hi reuera oleum & operam perdunt, uti & illi infelicissimi mortaliū, qui praenimio oestro venereo, antequam organa rite iuncta sint, semen profundunt, ut membrum, ubi ad rem veniendum esset, flaccidum pendeat. Ut taceam illos, qui quoties Helenam quandam conspiciantur, toties

s) FERNELIUS *Lib. VI. Cap. XVII.* steriles & infocundos dicit, quibus tenue, aquosum languidumque semen est.

toties non solum membri erectionem, sed & genitalis liquidi effluxum vel inuiti experiuntur; quae omnia uti de debilitate vasorum continentium testantur, ita & sterilitatem demum certo inferunt, immo teste CELSO *Lib. IV. de re med. cap. 21.* interposito spatio, tabe hominem consumunt.

§. XLVI.

Dum hic de semine virili speciatim agimus, vel verbo tangendam putamus quaestionem: An & mulieres semine prolifero gaudeant, consequenter, an non in hoc vitium sterilitatis quaerendum sit? Si HIPPOCRATEM & reliquos priscos medicinae patres sequeremur, statuendum omnino esset, feminarum genituram aequae ac maris ad generationem concurrere, quippe bonus ille Senex *Lib. de genitura. §. VI.* expresse scribit: *Emittit autem & mulier e corpore genituram aliquando in ipsum uterum, qui sane inde humidus euadit; & §. VII. Postquam autem coiuit mulier, & si quidem conceptura non est inter se ipsam, quo more foras procedet genitura ab utrisque, ubi femina volet. Si vero conceptura est, non procedit foras, sed manet in utero genitura. Nam uteri susceptam & conclusam in se continent, osculo nimirum ipsorum prae humiditate contracto & concluso, simulque permiscentur, tum quae a viro venit, tum quae a muliere emissa est.* Huic demum hypothese varia de conceptu maris vel femellae superstruit. At recentiorum si non omnes, tamen pluri mi hanc HIPPOCRATIS sententiam reiiciunt, adferen-

ferentes, liquidum illud mucosum, quod coitus tempore muliebria fundunt, Veteribus imposuisse, eo, quod analogiam quandam habere videatur cum semine virili; verum in hoc longe aliud quid latet, quod seminis essentiam constituit, quo mucidum illud vaginae muliebris vnguentum destituitur. Ad haec obseruarunt Anatomici, ea vasa, ex quibus humor hic libidinosus feminarum in complexu venereo erumpit, in exitu vaginae esse, neque, teste Illustr. HALLEO, *loc. cit. ad §. 673. not. c.* quidquam ex hoc humore in vteri cauitatem dimitti, adeoque nec ad generationem vllatenus aliquid conferre, id quod accuratissimi obseruatores, LEEVVENHOECK & MALPIGHIVS, clare ostenderunt. Vnde incomparabilis HARVAEVS, in *Exercitat. de generatione animal. Excercit. XXXIV.* scribit; *Vt vero iam praeteream, non omnes quorumlibet animalium feminas, nec mulieres quidem omnes, talem humorem emittere, nec citra eiusmodi emissionem conceptum necessario frustrari; noui enim plurimas, quae citra talem emissionem foecundae essent, & nonnullas etiam, quae postquam eiusmodi emissionem expertae sunt, maiori quidem voluptate in coitu delectarentur, sed de foecunditate solita plurimum amitterent.* Infinita sunt exempla feminarum, quae, licet in coitu voluptatem sentiant, nihil tamen emittunt, & nihilominus concipiunt. Nec obstat, quod feminae aequae suos testes habeant, his enim non semen, sed oua praeparant, docente immortalis memoriae BOERHAAVIO *loc. cit. ad §. DCLXXI.* Certum itaque est, neque
femi-

femine prolifero feminas gaudere, neque ex hoc capite eas steriles dici posse.

§. XLVII.

Alia vero in his, eaque numerosissimaprehenduntur generationis impedimenta, quae iam in specie inuestigabimus, lustraturi eodem ordine omnem adparatum muliebrem. *Lazar. RIVERIUS Prax. med. Lib. IX. Cap. XV.* sterilitatem in feminis quatuor modis contingere posse statuit, nimirum si non recipiant conuenienter virile semen; si non retineant iam receptum; si receptum non foueant & conseruent; ac denique si non nutriant dictum semen ad formationem & incrementum embryonis. Quod ad primum attinet, nullum dubium est, varias excrescentias, tumores & exulcerationes labiorum vaginae ac sinus muliebris non solum coitum prohibere, vel saltem difficilem reddere posse, sed & feminis receptionem frequentissime impedire. Sic clitoris nonnunquam tantae magnitudinis esse solet, ut formam virgae virilis adaequet, quae erectione & intumescencia sua impedimento est, quo minus vir feminae se apte iungere possit, ut *COLVMBVS* alique obseruatores id notarunt. Pari modo tumores in nymphis frequentes, fungosae varicosaeque excrescentiae, & efflorescentiae in & circa sinum muliebrem, insignes coitus & conceptus difficultates inferunt, ut recte de his cum *TIBULLO Lib. I. Eleg. X. v. 20.* dicere possimus:

Aspera est illis difficilisque Venus.

Circa has ipsas muliebrium partes variae disseminatae sunt glandulae, humidum mucosum secernentes, quod saepe, contracta ex variis causis acrimonia, adiacentes partes erodit, atque inflammationes, exoriationes, aliaque plurima mala producit. Immo non sine ratione illi, qui cum BAGLIVIO in *Prax. med. Cap. VIII.* inter fluorem album & gonorrhoeam muliebrem distinguunt, in hisce glandulis sedem morbi quaerunt, ex quibus sub ipso etiam fluxu menstruo saepe impurus ac virulentus humor stillat; quae vitia dum portam vteri obsident, sterilitati omnino ansam praebent.

§. XLVIII.

Nec desunt observationes, a SCHENCKIO *Lib. IV. obs. 12.* aliisque de feminis factae, quibus orificium vteri vel a natura inde ab vtero materno clausum, vel a morbo concretum est, quod vitium tanquam generationis obicem iam HIPPOCRATES *de morb. mul.* adnotavit, & inprimis CELSUS *Lib. VII. de re medic. Cap. XXVIII.* dum, *feminarum*, inquit, *naturalia nonnunquam inter se glutinatis oris concubitus non admittunt.* Hoc vitium in recens natis mox se prodit, ubi atretulae illae, mingere haud valentes, perpetuo clamant, & nisi tempestiva per scalpellum operatio suscipiatur, brevi ipsis pereundum est. Aliae vero aperturam quidem habent exiguam pro vrina reddenda, attamen os vaginae vteri membrana clausum est, quae, ubi adolescunt, nec concubitus admittunt, nec menstrua fundere possunt. Aliae denique os vaginae membrana clausum

sum habent, relicto tamen foraminulo, per quod menstrua suo tempore prodire possunt, sed concubitum eae admittere nequeunt, id quod saepe non nisi a sponso detegitur. Vid. Illustr. Laur. HEISTERI *Instit. Chirurg. Part. II. Sect. V. Cap. CXLVI.* Hae interim sterilitatis caussae, ubi detectae sunt, tolluntur scalpello & forfice, manu experti Chirurghi admotis. Longe difficilior autem curationem illae recipiunt, quae crassa & densa carne clausam, aut plane coalitam habent vaginam, conferuescentibus ubique eius parietibus, quod ex variis caussis externis & internis oriri posse docet laudatus Vir, *loc. cit. Cap. CXLVII.* Denique nimia quoque aditus huius angustia, siue vitium hoc a conformatione, siue a prava curatione ortum sit, negotium generationis impedit, ut & enormis nympharum excrecentia, fungi ac tubercula, itemque carunculae externas internasque vaginae partes infestantes, & saepe ad crura usque propendentes. Ita etiam mirae crurum distorsiones, enormis omenti pinguedo, muliebria operiens ac deformans, facile coitum aequae ac conceptum impossibilem reddunt. Equidem non ignoro, complura a BOHNIO, TAVRYO, HARVEO & RATIO, in observationibus suis, adduci exempla atretarum & angustarum, quae absque immissione seminis concepisse traduntur: sed cum observationes hae vel ipsa partus occasione, vel certe longo post impraegnationem tempore in illis feminis factae sint, magis credibile est, his tum, cum conceperunt, vias ad vterum patuisse liberas, & non nisi postea

morbo, vel alio casu, orificium vteri coaluisse; sed videfis de hac controuersia Illustr. HALLERVM, l. c. ad §. DCLXXIII. not. f. In ipsa porro vagina interdum variae polyposae & fungosae excrescentiae, vlcer, rhagades, ac fistulae cicatricesque occurrunt, quae non minus generationi officiunt. Proinde quoque benigna mater natura, vbi frictio vel motus frequentior in corpore humano esse solet, glandulas liquidum mucosum secernentes adposuit, quo superficies partis illius inungitur, id quod & in vagina obseruatur; hinc si glandulae hae obstructae sunt, ex defectu humoris istius sicca vagina, ariditate sua in complexu venereo coniuges non solum omni oblectamento priuat, sed etiam varia incommoda infert: si autem nimia eam inundat liquidi huius unguinosi copia, lubricitatem & laxitatem, vel etiam ipsius membranae, vaginam inuestientis, relaxationem ac prolapsum inducere, sicque sterilitatem excitare potest, nisi ars magna medicamentisque mature succurrat.

§. XLIX.

Sed inspiciamus iam *uterum*, primum illud omnium mortalium domicilium. Ad huius colli orificiique situm obliquum respexit potissimum HIPPOCRATES *Lib. de sterilit.* & DEVENTERVS, respectu partus difficilis, in *Nouo lumine obstetricum*, Cap. X. XII. XLVI. Meretur certe Sect. V. lib. cit. huc transferri, vbi diuus ille Senex scribit: *Et si os uterorum ex pudendo exciderit, neque sic concipit. Nam os durum fit, & genituram non suscipit, & intumescit, & propterea in totum infocunda est.* Ma-
nife-

nifesta est autem haec affectio, ex eo, quod contingit. Et si non prodeant menses, velut debent, sed deorsum processerint in sedem, neque sic in ventre concipit. Manifestum est enim, quod os uterorum a pudendo aversum est, aut conclusum. Et si quidem ad sedem aversam fuerit osculum, aut conclusum, curata foecunda fit. Vtrumque vero ex interrogatione Et responsione manifestum fit. Si enim menses semper sic prodierint, clarum est, quod his morbus causa est. Atque tot ac talia mulieribus contingunt, propter quae non pariunt, antequam curentur, Et propter quae omnino steriles fiunt. Quare mirari mulieres non oportet, quando coeunt quidem, non autem saepe pariunt. Plura loca huc facientia eodem libro, ut & Lib. de Natura, Et de morb. mulier. prostant, ex quibus clarum est, saepe sterilitatis causam in orificio uteri latere, quatenus illud praeter naturam in aliquam partem declinat, sicque distortum est, ut semen in coitu ad locum debitum penetrare, adeoque conceptus fieri nequeat. Ita etiam, si illud vel humore viscido, vel mensium & lochiorum sanguine coagulato aut concreto obstructum, vel etiam exulceratum callosumque sit. Non minus quoque ubi illud nimis hiat, teste HIPPOCRATE, genituram non suscipit, immo & susceptam non retinet, sed mox dimittit. Nonnunquam quoque vagina cum omento cohaeret, ex quo sterilitatem oriri statuit laudatus Senex de sterilibus, Sect. XV. Aphor. Sect. V. Aphor. 46. & de natura mul. XIX. 4.

§. I.

A tot ergo tantisque malis obnoxio, totque impedimentis generationis circumuallato vteri aditu & vestibulo, facile concludere licet ad ea, quae in interioribus eius recessibus cellulisque latere possunt. Supra iam notauimus, HIPPOCRATEM aliosque veteris ac recentioris aevi Medicos hoc viscus omnium morborum muliebrium scaturiginem dicere. Structuram eius ex anatomicis supponimus vasculoso-fibroso-spongiosam, vel si mauis, plane singularem, vique huius structurae illum aptum esse iudicamus primo, vt statis temporibus vestigal lunare soluat, dein genituram hauriat ac suscipiat, tum ouulum foecundatum, ex ouario & tuba Fallopiana deuolutum, recipiat, retineat, foueat, & vsque ad debitum tempus nutriet, ac in termino consueto foetum maturum edat. De fluxu menstruo, in quantum huius excessus, vel defectus, vel irregularitas, aliaque vitia sterilitatem producant, in antecedentibus fusius iam egimus; quod ad reliqua igitur momenta attinet, indagandum adhuc est, quae & qualia obstacula conceptionis ac generationis in vtero latere possint, idcirco considerabimus primum ipsum vterum cum adnexis suis ligamentis, tum tubas Fallopianas cum adiacentibus ouariis.

§. II.

Pro diuerso corporis feminei habitu diuersaque temperie, vteri quoque statum variare supra inuimus, cadunt quippe in hoc viscus omnes ibi memoratae intemperiei species, humida ac sicca, calida
atque

atque frigida, quae vitia sterilitatem inferre ex HIPPOCRATE supra §. XV. ostendimus t). Sed & densam vteri structuram coo suspectam esse, patet ex Sect. V. Aphor. 59. & 62. ubi hanc methodum explorandae foecunditatis praescribit: Si mulier in ventre non concipit, velis autem scire an conceptura sit, vestimentis circumtectam ex infernis suffito. Et si quidem odor per corpus tibi procedere videatur ad nares & ad os, scito quod ipsa non propter se ipsam infaecunda est. Densus enim, & ex hac causa sterilis uterus, ex mente laudati senis τὸ volatile in suffitu non transmittit. Quidquid vero de hoc experimento statuatur, existimamus, nimiae densitatis accusationem non carere fundamento, cum inde partim vasorum obstructiones, partim elasticitatis defectus necessario sequantur, quibus dein & conceptio, & foetus nutritio ac incrementum impediri debent. Recte ergo LOMMIVS, *Observat. medic. Lib. II. p. m. 247.* Primum itaque, inquit, scire licet, non concipere feminam posse, cui nimium frigidus ac densus est uterus, in quo nimirum viri semen extinguitur, nec etiam cui is ipse praesiccus atque calens est, nam semen, deficiente nutrimento, corrumpitur. Praeterea cum

in

t) Ex quo Clariss. MANNINGHAM loc. cit. p. 51. aphorismum sequentem format: Mulieres, inquiens, quibus uterus male temperatus est calidior, aridior, frigidior, humidiorue iusto, plerumque steriles sunt. Conf. & Francisc. IOEL, *Opp. med. Tom. IV. Lib. VIII. Sect. III. Cap. I.*

in vterum innumerae maiores & minores arteriae ac venae, vasaque serum lymphamque vehentia, cumulatim coeant, necessario in hunc, tanquam centrum corporis muliebris, omnes superflui humores congeruntur & confluunt, quorum tam effluxus continuus, quam stagnatio, coagulatio, concretio, vel viscida ac pituitosa infarctio, hincque nati polypi, obstructions *u*), vel si humores hi putrescant & acres euadant, inflammatio, gangraena, sphacelus & nunquam vteri cancer, totidem conceptus impedimenta, vsque dum medicamentis tollantur, sterilitatem indubitato producant. Huc refer statum corporis muliebris cacochymicum, cachecticum & tabidum, morbos item acutos & chronicos, quae vel organa haec generationi dicata per sympathiam afficiunt, vel sanguinis probi genesis ac praeparationem laedunt, menstruas denique anomalias, rheuma catarhumque vteri, fluorem album, inflationes, & quae sunt aliae harum partium adfectiones *x*). Nihil dicam

u) Ita Fridericianae huius quondam ornamentum, *Frid. HOFFMANNVS, Oper. Tom. III. Sect. I. Cap. VI. §. 11.* ex atonia vteri, mensstruis imminutis omnique humorum massa vitiata, sterilitatem oriri docet. Conf. *ibid. Cap. IV. §. 4.* Et *Vict. TRINCAVELLVS Consil. Lib. III. Consil. 79. & 80.* varia exempla habet feminarum illustrium, ex obstructione vteri itemque eius lubricitate sterilium.

x) A passione hysterica diuturna *SYDENHAMVS in Diss. episto-*

dicam de vteris hydropicis, scirrhis, cartilaginosis, mola, aut sarcomate obsessis, monstrosequē deformatis, de quibus observatores, SCHENCKIUS, RIGLANDVS, HARDEVS, alique consuli possunt, quibus malis affectae feminae ad concipiendum omnino inhabiles, adeoque steriles sunt.

§. LII.

Non minus etiam, quae primum nominanda erat, prava vteri structura, situsque praeternaturalis, saepe sterilitatis causa esse potest, siquidem hic in pelvi muliebri, tanquam ζῶον ἐν ζώῳ, libere sursum & deorsum, antrorsum & retrorsum, dextrorsum & sinistrorsum moveri, situmque & figuram suam frequenter mutare creditur, quos errores in situ vteri fusissime prosequitur HIPPOCRATES, *de morb. mulier. I. & II.* sterilitatem ab hac causa quoque derivans. Ita etiam in partu contra naturam, violentaque secundinarum, vel etiam foetus extractione, laesis destructisque vteri musculis, vel post sanationem laesionum aut ulcerum, cicatricibus relictis, difficilis vel plane impossibilis efficitur conceptus. Observatores mentionem quoque faciunt vaginae vterique duplicis, vel septo quodam in medio divisi, ut Illustr. HALLER, *loc. cit. ad §. DCLXIV. not. b.* complures observationes allegat, id quod quamvis rarius contingat, tamen ubi adest, facile impraegnationem impedire, adeoque

K

femi-

epistolari ad Guil. COLE, hydropem testium muliebrium, atque sterilitatem oriri docet. Vid. Opp. med. Tom. I. p. m. 266.

feminam sterilem reddere potest. Tandem de sectionibus caesareis notandum duximus, eas, si a prudenti & experto fiant Chirurgo, neque lethales esse, nec foecunditati officere, docente Illustr. PLATNERO, *Instit. Chirurg.* §. 1439. in notis, & GOFEY in *Hypothes. de generat. foetus, eiusque partu tum naturali, tum violento*, ubi sub finem varia exempla adducit feminarum, operationem caesaream plus vice simplici feliciter sustinentium, inprimis vero unius, quae sexies violento tali partu viuos ac robustos infantes edidit, extincto autem chirurgo, sex hasce operationes peragente, dum alter imperitus septimum foetum exsecaret, culpa chirurgi mater exspirauit.

§. LIII.

Interdum totum vterum ex pudendo excidere & instar scroti propendere, HIPPOCRATES *de morb. mulier. Lib. II. §. XXXIII. & seqq.* iam notauit, qui si ab aëre frigido afficiatur, facile incurabile contrahit vitium, vel etiam indurescit. Igitur nisi confestim debite reponatur, & sollicitè curetur, labem sterilitatis contrahit. Quod vero ad tubas Fallopianas adtinet, si harum ductus vel a natiuitate clausi, vel casu quocunque obstructi & oblitterati fuerint, vel cicatrice, a variolis, vel erosionibus ulceribusque superstitè, obsessi, impedita ouuli imprægnatione & in vterum deuolutione, generatio quoque impeditur; tantoque magis, si memoratae tubae penitus a natura nouerca denegatae, vel morbo deletae sint. Recte ergo a coecis Fallopianis tubis sterilitatem deducunt R V Y S C H I V S *Obs.* 83. &

& MANGETVS in *Theatr. anatom.* quas nonnunquam per totum tractum concretas, interdum hydro-picas, & in stupendam molem a collectis aquis exten-sas, obseruarunt DUVERNEY & HARDERVS in *Apiario n. LXXXVIII.* alii varie distortas & ab oua-rio aberrantes inuenerunt fimbrias, denique easdem vitiatas & paralyticas, quibus rebus fit, vt, dum in coitu omnia tument oestro venereo correpta, hae languidae iaceant, sicque conceptum impediant.

§. LIV.

Restant vltimo ipsa *ouaria*, quae cum singula-ris sint structurae, vitia quoque in iis latentia non fa-cile deteguntur. Interim notamus in his hydatides tumoresque ouulorum hydropicos, steatomata, mo-las, itemque concrementa carnea, vel cartilaginea, sae-pe in ouariis enata, oua in abdomen effusa, vel indu-rata ac scirrhusa, destructa, aut euanescentia, quales casus ex obseruatoribus adducit Illustr. HALLER, *l.c. ad §. DCLXIX. not. gg. & ad §. DCLXX. not. b.* atque hic status ovarii & ouorum muliebrium mor-bosus, siue ab intermissione Veneris, siue alio quo-cunque infortunio contingens, feminis maculam inu-rit sterilitatis; tanto magis, si, vt COLUMBVS ob-seruatum adnotat, & vterus & ouaria penitus desi-derentur. Ita etiam si contingat oua multo maiora esse, quam vt a tuba recipi possint, vt DUVERNEY *Zod. Gall. Ann. II. mens. Mart.* nec non LEEUWEN-HOECK & VALLISNERIVS obseruarunt; aut flaccida, marcescentia, vel duro carnosoque admo-dum cortice inuoluta, scabra, qualia in annosioribus mulie-

mulieribus notat Illustr. HALLER, *loc. cit. ad §. DCLXIX. not. d.* quae ouorum adfectiones singulae sterilitatem inducere possunt. Nec omittenda LISTERI observatio, qui in *Tract. de Fontibus medic. Angl.* frequentem sterilitatis causam ponit in cicatricibus, feminarum ouariis, aut ipsis ouis a variolis penitus lateque insertis.

§. LV.

Non dubitamus equidem, plura adhuc tam in maribus, quam feminis, latere felicitis humani generis propagationis impedimenta; sed nobis haec de sterilitatis in utroque sexu causis dicta sufficiant. Felices nos reputabimus, si quas earum cognoscere ac diiudicare potuimus, feliciores illos salutabimus, qui omnes eruent, & cognitae feliciter tollendi methodum indicabunt, nobis enim iam de causis dicere animus erat

T A N T V M.

E R R A T A.

Pag. 6. lin. 16. *videns lege videas.*

Pag. 40. lin. vlt. *nullam leg. nullum.*

Pag. 53. lin. vlt. *crectio leg. erectio.*

